

四庫全書

史部

欽定四庫全書

史部

御批資治通鑑綱目卷五十九

詳校官修撰

臣錢棨

編修

臣程嘉謨覆勘

總校官降調編修

臣倉聖脉

校對官中書

臣宋枋遠

謄錄監生

臣許溶

欽定四庫全書

御批資治通鑑綱目卷五十九

起壬子提要起壬子下有周太祖廣順二年凡八  
盡己未年盡己未下有周世宗顯德六年

年

周廣順二年。○是歲周南漢蜀唐北  
漢凡五國吳越湖南荆南凡三鎮

春正月唐湖南

將孫朗曹進作亂不克奔朗州

唐平湖南悉收其金帛珍玩倉粟乃至亭館花果之  
美者皆徙金陵遣都官郎中楊繼勲等收租賦務為  
苛刻湖南人失望行營糧料使王紹顏減士卒糧賜  
指揮使孫朗曹進怒謀殺紹顏及邊鎬據湖南歸中

原夜帥其徒燒府門鎬覺之出兵格鬪朗等奔朗州王達問朗湖南可取乎朗曰金陵朝無賢臣軍無良將忠佞無節賞罰不當得存幸矣何暇兼人朗請為公前驅取湖南如拾芥耳達悅厚遇之

### 周修大梁城

發開封民夫五萬旬日而罷

周泰寧軍節度使慕容彥超反周發兵討之唐人救之不克

彥超發鄉兵入城為戰守之備又多募羣盜剽掠鄰境敕以曹英為都部署討彥超向訓為都監藥元福為都虞候周主以元福宿將命英訓無得以軍禮見之二人皆父事之唐主發兵軍下邳以援彥超周師



逆擊大破之獲其將

燕敬權彥超勢沮

發明

彥超書反周書討而唐人書  
救所以見唐助逆之罪也

## 后師圍兗州

曹英等至兗州設長圍慕容彥超屢出戰藥元福皆  
擊敗之長圍合遂進攻之初彥超將反判官崔周度  
諫曰魯詩書之國自伯禽以來不能霸諸侯然以禮  
義守之可以長世公於國家非有私憾況主上開諭  
勤至苟徹備歸誠則坐享泰山之安矣彥超怒及是  
括士民之財以贍軍坐置財死者甚衆前陝州司馬  
閻弘魯傾家為獻彥超猶以為有所匿命周度索其  
家無所得彥超收弘魯夫妻繫獄有乳母於泥中拈  
得金纏臂獻之冀以贖其主彥超榜掠弘  
魯夫妻肉潰而死以周度為阿庇斬於市

集覽

榜掠  
注見

秦二世

二年

北漢攻周府州折德展敗之二月遂取岢嵐軍

書法

北漢嘗再書伐周矣此其書攻何伐而遁焉  
不足以言伐也自是兩相加兵書擊書攻而

已矣會契丹

兵亦書寇

周釋唐俘遣還

周主釋燕敬權等使歸唐謂其主曰叛臣天下所共  
疾也唐主助之得無非計乎唐主大慙先所得中國  
人皆禮而歸之然猶議取中原中書舍人韓熙載曰  
郭氏有國雖淺為治已固我兵輕動必有害而無益  
唐設科舉既而罷之

唐主好文學故韓熙載馮延巳延魯江文蔚潘佑徐鉉之徒皆至美官文雅於諸國為盛然未嘗設科舉多因上書言事拜官至是始命文蔚知貢舉執政皆不由科第相與沮毀竟罷之

書法

書惜之也

### 三月唐以馮延巳孫晟同平章事

唐以延巳晟為相既宣制戶部尚書常夢錫衆大言曰白麻甚佳但不及江文蔚疏耳晟素輕延巳謂人曰金盃玉盃乃貯狗矢乎延巳言於唐主曰陛下躬親庶務故宰相不得盡其才此治道所以未成也唐主乃悉以政事委之而延巳不能勤事並不治唐主乃復自覽之大理卿蕭儼惡延巳為人數上疏攻之會儼坐失入人死罪鍾謨李德明輩欲殺之延巳曰儼誤殺一婦人諸君以為當死儼九卿也可誤殺

乎獨上言儼素有直聲今所坐已會赦  
宜從寬宥儼由是得免人亦以此多之  
**集覽** 白麻注見前唐

德宗貞元

十一年

夏四月朔日食

唐遣兵攻桂州南漢擊敗之

唐主遣其將李建期圖朗州張巒圖桂州久未有功  
謂馮延巳孫晟曰楚人求息肩於我我未有以撫其  
瘡痍而虐用其力非所以副來蘇之望吾欲罷桂林  
之役欽益陽之戍以旌節授劉言何如晟以為然延  
巳曰吾出偏將舉湖南遠近震驚一旦三分喪二人  
將輕我請委邊將察其形勢唐主乃遣統軍使侯訓  
將兵與張巒合攻桂州  
**集覽** 來蘇之望書仲虺之誥  
南漢伏兵擊之大敗  
後來其蘇注湯所往之

民皆喜曰待我君  
來其可蘇息也

# 周主自將討兗州克之慕容彥超自殺

周主以曹英久無功下詔親征至兗州使人招諭之  
不從乃命進攻先是術者給彥超云鎮星行至角亢  
兗州之分其下有福乃立祠而禱之彥超貪吝人無  
鬪志將卒多出降官軍克城彥超方禱鎮星祠力戰  
不勝乃焚祠赴井死官軍大掠城中死者近萬人周  
主欲悉誅其將吏翰林學士竇儀見馮道范質與共  
白曰彼皆脅從耳乃赦之

**集覽** 鎮星行至角亢鎮星注見漢武帝  
元封元年角亢東方二宿名星經  
云角亢鄭之分野屬兗州

# 唐司徒李建勲卒

建勲且死戒家人曰時事如此吾得良死幸矣勿封土立碑聽人耕種於其上免為他日開發之標及江南之亡貴人家無不發  
惟建勲冢莫知其處

六月朔周主如曲阜謁孔子祠拜其墓質實

一統志云曲阜古邑

名神農少昊徙都之地周武王以封周公旦是為魯國秦為薛郡漢復為縣兼置魯國晉改國為郡隋初廢郡改縣曰汝陽後又改為曲阜因城中有阜委曲長數里故名唐貞觀初省尋復置屬兗州宋改為仙源縣金復為曲阜元仍舊本朝因之改屬兗州府孔子祠在曲阜縣西八里魯城內即闕里故宅唐開元初加封孔子為文宣王始宏廟制宋加脩理元初重建至本朝洪武初重加脩飾永樂中撤而新之中為大成殿左為泗水侯殿右為沂國公殿後有啟聖王魯國夫人毓聖侯三殿又前有宋真宗御書孔子讚石刻及至本朝御製廟碑

文其他門廡齋宮碑刻之盛不可殫紀有司春秋致祭朝廷三年一遣使致祭有事則遣廷臣祭告孔子墓在曲阜縣西八里世呼為孔林史記孔子葬於魯城北泗上弟子心喪三年畢相訣而去惟子貢廬於冢上凡六年弟子及魯人從而家者百餘室其冢至百餘畝塋中樹以千數皆異種相傳弟子異國人各持其方樹來種之塋中不生荊棘及刺人草王充論衡孔子當泗水而葬水為之却流墓有古石壇古石儀又有石檜蒼然如虹龍形相傳為孔子手植也

周主謁孔子祠將拜左右曰孔子陪臣也不當以天子拜之周主曰孔子百世帝王之師敢不敬乎遂拜又拜孔子墓命禁樵採訪孔子顏淵之後以為曲阜令及主簿

**書法** 書祠孔子多矣未有書日者此其書朔何重予之也卜朔而行禮致拜以重道可謂知所

尊矣故書朔書如終綱目書祠孔子五詳漢高帝十二年書謁孔子祠一而書如者二乙亥魏孝文帝是年其書日則一而已矣

發明周主起自行伍尚能言孔子為百世帝王之師於是展敬行禮而左右諛臣乃有孔子陪臣之說可謂謬之甚矣此謁祠拜墓綱目所以特書而美周主也

### 蜀大水壞其太廟

發明太廟必在高明之地而大水壞之滅亡之證著矣故特書之

### 周朔方節度使馮暉卒以其子繼業為留後

暉卒繼業殺兄繼勲自知

軍府事周主因而命之



契丹幽州節度使蕭海真請降于周不果

李濤之弟濬在契丹為勤政殿學士與海真善說海真內附海真欣然許之濬因謀以聞且與濤書言契丹主童駮無遠志朝廷若能出兵必克不然與和必得二者皆利於速度其情勢他日終不能力助河東者也會中國多事不果從

書法

不果何不果從也於是中國多事遂不果從不果從矣則何以書嘉慕華也

發明

幽州請降於周既不果從何必書之所以致其嗟惜之意也

秋七月周樞密使王峻辭位不許

峻性輕躁多計數好權利喜人附已每言事見從則喜或未允輒愠懟不遜周主以其故舊有功每優容

之峻益驕鄭仁誨向訓李重進皆周主在藩鎮時腹  
心將佐也稍稍進用峻心嫉之累表稱疾求解機務  
又遺諸道書求保證諸道以聞周主驚駭遣左右慰  
勉令視事不至以直學士陳觀與峻親善令往諭旨  
觀曰陛下但聲言臨幸其第嚴駕以待之峻必  
不敢不來從之峻乃入朝周主慰勞令視事

集覽

臨幸行幸也蔡邕曰天子車駕所至民臣皆以為僥  
倖故謂之幸蓋幸其恩沛之及也嚴駕嚴裝車駕也  
凡治行李  
曰戒嚴

蜀梓州監押王承玉殺判武德軍郭延鈞指揮使孫欽

討誅之

延鈞不禮於承玉奉聖指揮使孫欽當以兵戍邊往  
辭承玉承玉邀與俱見府公至則令左右擊殺延鈞

屠其家矯詔開府庫賞士卒出繫囚發屯戍將吏畢  
集欽謂承丕曰今延鈞已伏辜公宜出詔書以示衆  
承丕曰我能致公富貴勿問詔書欽始知承丕反因  
給曰今内外未安請為公巡察即躍馬而出曉諭其  
衆帥以入府攻承  
丕斬之傳首成都

### 周天平節度使高行周卒

行周有勇而知義功高而不矜策馬臨敵叱咤  
風生平居與賓僚宴集侃侃和易人以是重之  
叱咤風生叱咤昌粟反叱咤竹駕反叱咤發怒  
聲風生雷厲風飛之謂言其威聲可畏也

周制犯鹽麴者以斤兩定刑有差○九月周禁邊民毋  
得入契丹界俘掠○契丹寇冀州周兵拒卻之考證

寇當

作攻周

○冬十月武平留後劉言遣兵攻潭州唐節度使

邊鎬棄城走言遂取湖南

唐武安節度使邊鎬不合衆心吉水人歐陽廣上書言鎬非將帥才必喪湖南不報乃使鎬經畧朗州自朗來者多言劉言忠順鎬不為備唐主召言入朝言不行謂王逵曰唐必伐我奈何逵曰邊鎬撫御無方士民不附可一戰擒也言乃以逵及周行逢何敬真潘叔嗣張文表等十人皆為指揮使部分發兵行逢能謀文表善戰叔嗣果敢三人多相須成功情款甚昵諸將欲召叔州酋長苻彥通行逢曰蠻貪而無義前年入潭州焚掠無遺吾兵以義舉往無不克烏用此物使暴殄百姓哉乃止然亦畏彥通為後患以蠻酋劉瑫為西境鎮遏使以備之十月逵等將兵分道趣長沙以孫朗豐進為先鋒使邊鎬遣兵屯益陽逵

等克之遂至潭州鎬棄城走吏民俱潰達入城自稱  
武平節度副使權知軍府事以何敬真為行軍司馬  
唐將守湖南諸州者相繼遁去劉言盡  
復馬氏嶺北故地惟郴連入于南漢  
唐末所置治廬陽縣五代因之宋改為沅州元初置  
沅州路尋復降為州隸辰州路至本朝初陞為沅州  
府尋復為州省縣入焉改屬辰州府益陽秦之縣名  
屬長沙郡以縣在益水之陽故名漢屬長沙國三國  
吳屬衡陽郡隋唐皆屬潭州宋屬鼎州尋復屬潭州  
元陞為州至本朝復為縣改屬長沙府郴隋之州名  
注見楚義帝元年連隋初州名治桂陽縣大業初改  
為平郡唐為連州天寶初改連山郡乾元初復為連  
州元置連州路隸湖南道大德中降路為州  
隸英德路至本朝初省後復置屬廣州府

## 契丹大水

漢莫幽州大水流民入塞者四十萬口周詔所  
在賑給存處之中國民被掠得歸者十五六

書法

書大水多矣必中土也此契丹水耳何必書  
志善政也於是流民入塞四十萬周主詔賑

給之以是為  
善政故書之

### 周平章事李穀辭位不許

穀以病臂辭位周主遣中使諭旨曰卿所掌至重朕  
難其人苟事功克集何必朝禮穀不得已復視事穀  
未能執筆詔以三司  
路繁令刻名印用之

### 周立訴訟法

教民有訴訟必先歷縣州及觀察使處決不直乃聽  
詣臺省或自不能書牒倩人書者必書所倩姓名居

處若無可倩聽執素紙所訴  
必須已事毋得挾私客訴

# 周慶州野雞族反遣折從阮討之

慶州刺史郭彥欽性貪野雞族多羊馬彥欽故擾之  
以求賂野雞族遂反徙折從阮為靜難節度使討之  
質實一統志云慶州隋初所置治合水縣後改為弘  
化郡唐初復為慶州天寶初改安化郡乾元初  
復為慶州陞安定軍五代梁改武靜軍宋初仍為慶  
州尋陞為慶陽節度金初改安國軍後置慶原路元  
初復為慶陽府本  
朝因之隸陝西道

# 劉言奉表于周

# 唐馮延巳孫晟罷削邊鎬官爵流饒州

初鑄從查文徽克建州凡所俘獲皆全之建人謂之邊佛子及克潭州市不易肆潭人謂之邊菩薩旣而政無綱紀惟日設齋供盛修佛寺潭人失望謂之邊和尚矣馮延巳孫晟上表請罪皆釋之晟陳情不已乃與延巳皆罷唐主以比年出師無功乃議休兵息民或曰願陛下數十年不用兵可小康矣唐主曰將終身不用何數十年之有思歐陽廣之言拜本縣令

## 十一月周制稅牛皮法

勅約每歲民間所輸牛皮三分減二計田十頃稅取一皮餘聽賣買惟禁賣於敵國自兵興以來禁民私賣買牛皮悉令輸官受直唐明宗之世有司止償以鹽晉天福中并鹽不給漢法犯私牛皮一寸抵死然民間日用實不可無至是李穀建議均於田畝公私便之



十二月河決鄭滑周遣使修塞

周靜難節度使侯章入朝

章獻買宴絹千匹銀五百兩周主不受曰諸侯入覲天子宜有宴犒豈待買邪自今如此比者皆不受

周葛延遇李澄伏誅

翰林學士徐台符請誅誣告李崧者馮道以為屢更赦不許王峻嘉台符之義白收二人誅之  
覽白收謂稟白於上而收捕之

書法

葛李為姦逆於漢者也此周矣書伏誅何書

之懲惡

嚴矣

癸周廣順三年。是

春正月周以劉言為武平節度使

劉言上表于周乞移使府治朗州且請貢獻茶悉如馬氏故事許之以言為武平節度制置武安靜江等軍事王逵為武安節度使何敬真為靜江節度使周行逢為武安行軍司馬

### 唐罷戶部營田務除租牛課

前世屯田皆在邊地使戍兵佃之唐末中原宿兵所在皆置營田以耕曠土其後又募高貲戶使輸課佃之戶部別置官司總領不隸州縣或丁多無役或容庇姦盜州縣不能詰梁太祖擊淮南得牛萬計以給農民使歲輸租牛死而租不除民甚苦之周主素知其弊李穀亦以為言敕悉罷之以其民隸州縣田廬并具並賜見佃者為永業是歲戶部增三萬餘戶民既得為永業始敢葺屋植木獲地利數倍或言營田

有肥饒者不若鬻之可得錢數十萬緡以資國周主曰利在於民猶在國也朕用此錢何為唐草澤邵棠上言近游淮上聞周主恭儉增脩德政吾兵新破於潭朗恐其有南征之志宜為之備

集覽草澤

邵棠草澤猶言草野之士也邵棠其姓名前唐太宗時有上書者言臣居草澤注草澤寂寞之地也

發明

人主苟有愛民之心則必有愛民之政矧如五代亂離之極尤賴撫養之仁周太祖既立

訴訟法又定稅牛皮法又罷營田務除租牛課此亦可謂有恤民之心者綱目詳而書之此所以致其予之之意耳詩曰民亦勞止汙亦可小康

### 周萊州刺史葉仁魯有罪伏誅

仁魯周主故吏也坐贓賜死周主遣中使賜以酒食曰汝自抵國法吾無如之何當存恤汝母仁魯感泣

周遣王峻行視決河

周主以決河為憂王峻請自行視許之鎮寧節度使榮屢求入朝峻忌其英烈每沮止之至是榮復求入朝周主

集覽

自行視行下孟反按行也謂親往決河巡視也

契丹寇定州周將楊弘裕擊走之考證

寇皆當作攻周謹按綱目之作

其事則周秦漢晉隋唐其義則內中國外夷狄夫淳維之地無氏族以別其類無田廬以定其業無禮樂以脩其政無學問以資其身故曰夷狄不可以中國之治治之也帝王之世服則懷之以德否則畏之以威內外之分截然有制由秦至晉中國自中國夷狄自夷狄晉至隋夷狄入中國唐至五季中國資夷狄綱目而後固未暇論世道之變日趨於下矣秦使蒙恬北攻河南地因河為塞通直道起臨洮至遼東延袤萬餘里胡人不敢

南牧漢用陳平厚遺閼氏用婁敬結和親曰厚遺者納幣之始曰和親者交中國之始拒之以兵草扼之以險阻則有以絕其侵中國之路厚遺以資之和親以悅之則有以啟其覲中國之心然則蒙恬功之首陳平婁敬罪之魁也孝武時衛青霍去病將百萬衆橫行匈奴中終西漢無北顧之憂其功不在蒙恬下東漢曹魏徙羗胡內地養虎以自遺害然猶未至大入也晉初郭欽上疏不納江統著論不用遂至青衣行酒於光極羊車肉袒於虜庭五帝三王之都悉為所染汙矣唐用劉文靜資突厥取天下肅宗資回紇討賊石晉用桑維翰資契丹得國平居閼絕猶防猾夏之患况資其力取大利乎若文靜維翰之罪浮於陳平婁敬可知也考之凡例中國有主則夷狄書寇無主書入又曰正統用兵於夷狄書伐書攻書擊大賢立言匡中國守四夷在一字之間曰寇曰入嚴於直道之制曰伐曰攻曰擊勇於百萬之師其外之亦至矣且窮兵黷武非上計也納幣和親非

良策也有志於天下必謹內外之分脩德立威以柔服之至其弗率然後徂征將如蒙恬衛青霍去病則將之言如郭欽江統則用之失計如陳平婁敬劉文靜○周柔維翰則誅之若然則中國乂安萬世永賴矣

鎮寧節度使郭榮入朝質實

鎮寧節度注見太祖廣順三年

故李守貞騎士馬全義從榮入朝召見補殿前指揮使謂左右曰全義忠於所事昔在河中屢挫吾軍汝輩宜效之

書法

前書養子榮矣辛亥年此書郭榮何正之為周王之子也

周以王峻兼平盧節度使

峻聞榮入朝遽歸大梁固求出鎮故有是命

周野雞族降

武安節度使王逵殺靜江節度使何敬真

初王逵以何敬真為靜江副使朱全瑋為武安副使張文表為武平副使周行逢為武安司馬敬真全瑋各置牙兵與逵分廳視事惟行逢文表事逵盡禮逵親愛之敬真辭歸朗州又不能事劉言與全瑋謀作亂言疑逵使敬真伺已將討之逵懼行逢曰言素不與吾輩同心敬真全瑋耻在公下宜早圖之會南漢寇全州行逢請說言遣敬真全瑋南討俟至長沙以計取之逵從之言遣敬真全瑋將兵禦南漢至長沙逵迎見甚歡宴飲連日多以羨妓餌之敬真淹留不進逵乘其醉使人詐為言使者責敬真全瑋收斬之

周更作二寶

初契丹主德光以晉傳國寶北還至是更以玉作二寶

### 周賤王峻為商州司馬

峻晚節益狂躁奏請以顏衍陳觀為相周主曰進退宰輔不可倉猝俟更思之峻語漸不遜乃退周主幽峻別所召見馮道等泣曰王峻凌朕太甚欲盡逐大臣翦朕羽翼朕惟一子專務間阻無君如此誰則堪之乃賤峻商州司馬以病卒

### 三月周主以郭榮為開封尹封晉王

書法

封子未有書姓者此何以書正名也五季不立太子封為晉王則將承大業矣不可以不

正也然則曷為不書子不書子所以別於正統也故封子不書主此特書之予得人也



## 周寧州殺牛族反

初殺牛族與野雞族有隙聞官軍討野雞饋餉迎奉官軍利其財畜而掠之殺牛族反與野雞合敗州兵于包山周主以郭彥欽擾羣胡致其作亂黜廢於家

## 周以郭元昭為慶州刺史

初解州刺史郭元昭與權鹽使李溫王有隙溫王壻魏仁浦為樞密主事元昭疑仁浦庇之會李守貞反溫王有子在河中元昭收繫溫王奏言其叛事連仁浦周主時為樞密使知其誣釋不問至是仁浦為樞密承旨元昭代歸甚懼過洛陽以告仁浦弟仁滌仁滌曰吾兄平生不與人為怨况肯以私害公乎既至仁浦白以元昭

為慶州刺史

唐復以馮延巳同平章事

書法

書復以何譏貳過也復以為之辭四有改過之辭有貳過之辭有不能令之辭有因仍之

辭詳漢文

帝十四年

夏六月契丹將張藏英降周○周九經板成

初唐明宗之世令國子監校正九經刻板印賣至是板成獻之由是雖亂世九經傳布甚廣是時蜀母昭裔亦出私財百萬營學館且請刻板印九經蜀主從之由是蜀中文學亦盛

書法

成者何蒙成也先是明宗始命刻板至是而成綱目於唐書初於周書成錄實也石經經

板綱目

備書之

王逵襲破朗州執劉言殺之○秋七月唐大旱

唐大旱井泉涸淮水可涉饑民度淮相繼濠壽發兵  
禦之民與鬪而北周主聞之曰彼我之民一也聽糴  
米過淮唐人遂築倉多糴以供  
軍八月詔以舟車運載者勿予

八月王逵還潭州以周行逢知朗州事

逵遣使上表請復移使府治潭  
州從之逵以周行逢知朗州事

周塞決河

書法

周太祖即位至是三年書罷貢珍食書詔上  
封事書毀寶器書謁孔子祠拜其墓書立訴

訟法書制稅牛皮法書罷戶部營田務除租牛課  
再書塞決河可書之善多矣至書唐淮南饑契丹

大水唐大旱庶幾有君人之度者綱目尤深予之

周大水○周築郊社壇作太廟於大梁

周主自入秋得風痺疾術者言宜散財以禳之周主欲祀南郊又以自梁以來郊祀常在洛陽疑之執政曰天子所都則可以祀百神何必洛陽於是始築圓丘社稷壇作太廟於大梁

周鄴都留守王殷入朝周主殺之

殷恃功專橫凡河北鎮戍兵應用敕處分者殷即以帖行之又多掠斂民財周主聞之不悅因其入朝留充京城內外巡檢因力疾御殿殷入起居遂執之下制誣殷謀以郊祀日作亂殺之

書法

上書入朝下書殺之病周也殷雖專橫誣以謀亂則非罪矣故斥書主綱目入朝書殺之

者一

而已

# 唐復置科舉

從知制誥徐

鉉之請也

# 唐流徐鉉於舒州貶徐鉉為校書郎分司

唐楚州刺史田叡洙請修白水塘溉田以實邊馮延巳以為便李德明因請大闢曠土為屯田脩復所在渠塘墮廢者吏因緣侵擾大興力役奪民田甚衆徐鉉以白唐主唐主命鉉按視之鉉籍民田悉歸其主或譖鉉擅作威福唐主怒流鉉舒州然白水塘竟不成唐主又命少府監馮延魯巡撫諸州右拾遺徐鉉表延魯無才多罪舉措輕淺不宜奉使唐主怒貶鉉校書郎分司東都鉉之弟也質實一統志云

楚州隋初所置治山陽縣後併入江都郡唐初改為東楚州天寶初改淮陰郡乾元初復為楚州五代時南唐陞順化軍宋初仍為楚州後置淮安軍尋陞為州元陞為淮安路至本朝改為淮安府直隸京師白水塘在淮安府山陽縣南九十五里魏鄭艾伐吳時脩以灌田

### 周主朝享太廟疾作而退

周主享太廟纔及一室不能拜而退命晉王榮終禮是夕宿南郊幾不救夜分小愈

甲周顯德元年正月世宗睿武孝文皇帝榮立冬北寅漢乾祐七年孝和帝鈞立○是歲凡五國三鎮

### 書法

五代之君其始即位分注書某祖某宗而已世宗則曷為舉其全謚書曰睿武孝文皇帝尊之也尊之何世宗五代之賢君故綱目特重予之不使夷於五代之主也雖後唐明宗不得與於

斯矣

# 春正月朔周主祀圓丘

周主祀圓丘僅能瞻仰致敬而已

# 周以晉王榮判內外兵馬事

時羣臣希得見中外恐懼聞晉王典兵人心稍安軍士有流言郊賞薄者周主聞之召諸將至寢殿讓之曰朕自即位以來惡衣菲食專以贍軍為念汝輩豈不知之今乃縱凶徒騰口不思己有何功惟知怨望於汝輩安乎皆惶恐謝罪退索不逞者戮之流言乃息

# 周罷鄴都○周主疾篤詔晉王榮聽政

初周主在鄴都奇愛小吏曹翰之才使之事晉王榮  
榮鎮澶州以為牙將榮入尹開封翰請問曰大王國  
之儲嗣今主上寢疾大王當入侍醫藥奈何猶決事  
於外邪榮感悟即日入止禁中周主疾篤停諸司細  
務勿奏有大事則晉王榮稟進止宣行之屢戒榮曰  
昔吾征西見唐十八陵無不發掘者此無他惟多藏  
金玉故也我死當衣以紙衣歛以瓦棺壙中無用石  
以甕代之工人役徒皆和雇勿以煩民葬畢募近陵  
民三十戶蠲其雜徭使之守視勿脩下宮置官人作  
石羊虎人馬惟刻石置陵前云周天子平生好儉約  
遺令用紙衣瓦棺嗣天子不  
敢違也汝或吾違吾不福汝

周遣使分塞決河○周以王溥同平章事

周主命趣草制相溥  
宣畢曰吾無恨矣



周主威殂晉王榮立

是為

世宗

二月蜀匡聖指揮使安思謙伏誅

思謙譖殺張業廢趙廷隱蜀人皆惡之將兵救王景崇逗撓無功內不自安言多不遜多殺士卒以立威蜀主閱衛士有年尚壯而為思謙所斥者復留隸籍思謙殺之蜀主不能平翰林使王藻言思謙怨望將反思謙入朝蜀主命壯士擊殺之藻亦坐擅啟邊釁并誅

集覽

逗撓撓與撓通注見漢武帝元光二

年

北漢主以契丹兵擊周周昭義節度使李筠逆戰敗績

北漢主聞周太祖殂甚喜遣使請兵于契丹契丹遣其政事令楊究將萬騎如晉陽北漢主自將兵三萬以白從暉為都部署張元徽為前鋒使與契丹趣潞州節度使李筠遣其將穆令均將兵逆戰張元徽與戰陽不勝而北令均逐之伏發被殺筠遁歸上黨嬰城自守筠即榮也避世宗名改焉

發明

北漢之兵自以有詞可執然書擊不書伐者一以伐人之喪一以用夷狄戕中國也

三月周主自將與漢戰于高平漢兵敗績周將樊愛能

何徽等伏誅

世宗欲自將禦漢兵羣臣皆曰劉崇自平陽遁走以來勢感氣沮必不敢自來陛下新即位山陵有日人心易搖不宜輕動宜命將禦之世宗曰崇幸我大喪輕朕年少新立此必自來朕不可不往馮道固爭之

世宗曰昔唐太宗定天下未嘗不自行朕何敢偷安  
道曰未審陛下能為唐太宗否世宗曰以吾兵力之  
彊破劉崇如山壓卵耳道曰未審陛下能如山否世  
宗不悅惟王溥勸行乃命馮道奉梓宮赴山陵遂發  
大梁至懷州欲兼行速進指揮使趙晁私謂通事舍  
人鄭好謙曰賊勢方盛宜持重以挫之好謙以聞世  
宗怒并晁械執之進宿潭州東北北漢主軍高平南  
明日周前鋒擊之北漢兵卻世宗慮其遁去趣諸軍  
亟進北漢主陳於巴公原張元徽軍其東楊衮軍其  
西衆頗嚴整周河陽節度使劉詞將後軍未至衆心  
危懼而世宗志氣益銳命白重贊李重進將左軍居  
西樊愛能何徽將右軍居東向訓史彥超將精騎居  
中張永德將禁兵自衛介馬臨陳督戰北漢主見周  
軍少悔召契丹謂諸將曰今日不惟克周亦可使契  
丹心服楊衮策馬前望周軍退謂北漢主曰勁敵也  
未可輕進北漢主奮髯曰請公勿言試觀我戰時東

北風盛俄轉南風北漢副樞密使王廷嗣使司天監李義白其主曰時可戰矣北漢主從之樞密直學士王得中扣馬諫曰義可斬也風勢如此豈助我者邪北漢主曰吾計已決老書生勿妄言斬汝麾東軍先進擊周右軍合戰未幾周樊愛能何徽引騎兵先遁右軍潰步兵千餘人解甲降北漢世宗見軍勢危自引親兵犯矢石督戰我太祖皇帝時為宿衛將謂同列曰主危如此吾屬何得不致死又謂張永德曰賊氣驕可破也公引兵乘高西出為左翼我為右翼以擊之國家安危在此一舉永德從之各將二千人進戰太祖身先士卒馳犯其鋒士卒死戰無不一當百北漢兵披靡內殿直馬仁瑀躍馬引弓連斃數十人土氣益振殿前行首馬全義引數百騎進陷陳北漢主褒賞張元徽趣使乘勝元徽前畧陳馬倒為周兵所殺北軍奪氣時南風益盛周兵爭奮北漢兵大敗楊衮畏周兵之彊不敢救且恨北漢主之語全軍而

退愛能徽引騎南走剽掠輜重揚言契丹大至官軍  
敗績餘衆已降虜矣世宗遣近臣諭止之不聽殺使  
者與劉詞遇止之詞不從引兵北時北漢主尚有餘  
衆萬餘人阻澗而陳薄暮詞至復與諸軍擊敗之追  
至高平僵尸滿谷委棄御物及輜重器械雜畜不可  
勝紀是夕世宗野宿得步兵之降敵者皆殺之愛能  
等聞捷與士卒稍稍復還明日休兵高平選北漢降  
卒數千人為効順指揮遣戍淮上餘二千餘人賜資  
裝縱遣之北漢主帥百餘騎晝夜北走所至得食未  
舉筋或傳周兵至輒蒼黃而去衰老力憊殆不得支  
僅得入晉陽世宗欲誅樊愛能等猶豫未決晝卧帳  
中張永德侍側因以訪之對曰愛能等素無大功忝  
冒節鉞望敵先逃死未塞責且陛下方欲削平四海  
苟軍法不立雖有熊羆之士百萬之衆安得而用之  
世宗擲枕於地大呼稱善即收愛能徽及所部軍使  
以上七十餘人責之曰汝輩非不能戰正欲以朕為

奇貨賣與劉崇耳悉斬之徽先守晉陽有功欲免之  
既而以法不可廢遂并誅之而給檻車歸葬自是驕  
將情卒始知所懼不行姑息之政矣永德稱我太祖  
之智勇世宗擢為殿前都虞候餘將校遷拜者凡數  
十人有自行間擢主軍廂者釋趙晁之囚北漢主收  
散卒繕甲兵完城塹以備周遣王得中送袞因求救  
於契丹契丹集覽介馬臨陳介甲也陳讀曰陣檻車注  
丹主許之見漢武帝元光二年送袞句絕契丹  
先所遣楊袞也

今送歸其國

質實

北三十五里今名巴公鎮

發明

五代之際將驕卒情久矣高平之戰雖平時

未嘗進諫如馮道者猶且力沮其行則餘人  
不言可知兵鋒始交樊愛能何徽等即引兵先遁  
右軍遂潰向非世宗親犯矢石我太祖皇帝身先  
士卒則勝敗固未可知幸而大捷叛將復還釋此  
不誅則是棄主與敵之人可以僥倖漏網者也一

言之決大呼稱善按法行辟軍政始行世宗兵威之振實肇乎此宜乎綱目於愛能等特以伏誅書之也

周遣行營部署符彥卿督諸將攻北漢至晉陽孟縣汾

遼州降質實

一統志云孟縣漢初所置屬太原郡後魏省隋復置唐屬并州金元依舊至本朝改

屬太

原府

世宗遣符彥卿等北征但欲耀兵於晉陽城下未議攻取既入北漢境其民爭以食物迎勞泣訴劉氏賦役之重愿供軍須助攻晉陽州縣亦繼有降者世宗始有兼并之意諸將皆以糧乏請班師不聽既而軍士不免剽掠北漢民失望稍稍保山谷自固世宗聞之馳詔禁止剽掠安撫農民止徵今歲租稅及募民

入粟拜官有差發近便諸州民運糧  
以饋軍遣李穀詣太原計度芻糧

### 周太師中書令瀛王馮道卒

自後晉至周皆以篡得國馮道歷臣其比有主之人其俯仰光怪不諱當何若矣乃猶著長樂老以自述其榮遇當時反以總量稱之四維不張於茲為甚無惑乎其亂亡接踵也

道少以孝謹知名唐莊宗世始貴顯自是累朝不離將相公師之位為人清儉寬弘人莫測其喜愠滑稽多智浮沈取容嘗著長樂老叙自述累朝榮遇之狀時人往往以德量推之歐陽公曰禮義廉耻國之四維四維不張國乃滅亡況為大臣而無廉耻天下其有不亂國家其有不亡者乎馮道其可謂無廉耻者矣則當時天下國家可知也予於五代得全節之士三死事之臣十有五皆武夫戰卒豈於儒者果無其人哉得非高節之士惡時之亂而不肯出歟嘗聞是時有王疑者家青齊之間為號州司戶參軍以卒妻李氏負其遺骸以歸東過開封止於旅舍主人不納牽其臂而出之李氏仰天慟曰我為婦人不能守節



而此手被人所執邪即引斧自斷其臂見者為之嗟  
泣開封尹聞之白其事於朝厚恤李氏而答其主人  
嗚呼士不自愛其身而忍耻以偷生者聞李氏之風  
宜少知愧哉司馬公曰天地設位聖人則之以制禮  
立法內有夫婦外有君臣婦之從夫終身不改臣之  
事君有死無貳此人道之大倫也苟或廢之亂莫大  
焉范質稱馮道厚德稽古宏才偉量雖朝代遷貿人  
無間言屹若巨山不可轉也夫為女不正雖復華色  
之美纖絀之巧不足賢矣為臣不忠雖復材智之多  
治行之優不足貴矣何則大節已虧故也道之大節  
如此雖有小善庸足稱乎或以為當是之時失臣節  
者非道一人豈得獨罪道哉夫忠臣憂公如家見危  
致命智士有道則見無道則隱今道尊寵冠三師權  
任首諸相國存則竊位素餐國亡則迎謁勸進茲乃  
姦臣之尤安得與他人為比哉或謂道能全身遠害  
於亂世斯亦賢已夫君子有殺身成仁豈專以全身

遠害為賢哉然不正之女中士羞以為家不忠之人  
中君羞以為臣若道之為臣而不誅不棄則亦時君  
之責也

集覽

著長樂老叙著記述也時天下大亂生民  
之命急於倒懸馮道方自號長樂老著書

數百言陳已更事四姓及契丹所賜階勳官爵以為  
榮自謂孝於家忠於國有子有孫時開一卷時飲一  
杯老而自樂何樂如之其自述之叙大  
畧如此屹若屹魚及反屹岬山危峻貌

書法

五代之臣書卒未有官爵具者道也而書官  
書爵卒之何愧之也道以一身歷四姓十君

無耻甚矣綱目於其進用備書之故唐書為掌書  
記書為端明殿學士書同平章事書匡國節度使  
晉書同平章事書守司徒兼侍中契丹書為太傅  
漢書為太師中書令瀛王皆所以愧之也豈郭子  
儀諸賢

比哉

發明

綱目凡名臣之卒則書官書爵今馮道書法如此殆與房杜姚宋無異亦予之乎曰道之

失節先儒固已交譏之矣何待贅及然而書官之意則以譏當時人君寵遇尊獎者耳若曰浮沉取容迎降賣國貶易人主如斯人者固當廢斥貶責不使之得預縉紳之列可也今乃顯榮終始之極其殊遇至於如此故反書其太師中書令瀛王以譏之也不然豈有一人臣之身事四姓十君尚可得齒於人乎噫

北漢憲嵐州降周○周立后符氏考異

按尊立例曰立后曰立皇后某

氏非正嫡曰立某氏為皇后非正統去皇號據分注符氏先嫁李守貞之子崇訓不宜母天下又非妃妾之比則此亦當書周考證  
當作周立符氏為后○謹按凡例立符氏為后  
曰立后曰立后某氏非正嫡曰立

某氏為后夫正始之道王化之基是以關雎窈窕淑女君子好逑匡衡言能致其貞淑不二其操然後可以配至尊而為宗廟主五季稱周世宗賢君常與儒者讀前史商確大義至於得國立李崇訓妻符氏為后崇訓父子反逆事敗弟妹皆死而符不能死安在其為貞淑而可為宗廟之主王化之基乎周太祖既殺其夫為世宗娶之亦何心哉抑不見魏道武殺人之夫而納其妻生子而弑道武世宗讀前史獨不與儒者商確此義乎易曰家人女正位乎內失身者不可以正內也又曰夫夫婦婦而家道正失節者不可以正家也又曰正家而天下定矣世宗卒不能定天下良以此夫本經史之義取非正嫡例書曰周立符氏為后以表世宗不當立而符氏不當為后也

初符彥卿有女適李守貞之子崇訓相者言其貴當為天下母守貞喜曰吾婦猶母天下况我乎反意遂

決及敗崇訓先自刃其弟妹次及符氏符氏匿幃下崇訓倉猝求之不獲遂自剄亂兵既入符氏安坐堂上叱亂兵曰吾父與郭公為昆弟汝曹勿無禮太祖遣使歸之於彥卿既而為世宗娶之至是立為皇后后性和惠而明決世宗甚重之

發明

聞諸侯一娶九女矣未聞以天子自居而立人之婦以母天下者也故書立后符氏而不

書立符氏為后明其婦而不女以譏之也

周師克北漢石州沁忻州降○五月王逵徙治朗州以周行逢知潭州事○周主攻晉陽不克引軍還

世宗自潞州趣晉陽至其城下旗幟環城四十里楊衮奔歸契丹契丹主怒其無功囚之使數千騎屯忻

代之間周遣符彥卿等擊之彥卿入忻州契丹退保忻口其遊騎時至城下彥卿與諸將陳以待之史彥超將二十騎為前鋒殺契丹二千人恃勇輕進為契丹所殺周兵死傷甚衆彥卿引兵還晉陽折德辰將州兵來朝復置永安軍以德辰為節度使時大發兵夫攻晉陽不克會久雨士卒疲病及彥超死乃議引還初王得中返自契丹值周兵囚送于軍世宗釋之賜以帶馬問虜兵何時當至得中曰臣受命送楊衮他無所求或謂得中曰公不以實告契丹兵即至公得無危乎得中太息曰吾食劉氏祿有老母在圍中若以實告周人必發兵據險以拒之如此家國兩亡吾獨生何益不若殺身以全家國所得多矣乃縊殺之世宗將發晉陽匡國節度使藥元福曰進軍易退軍難乃勒兵成列而殿北漢果出兵追躡元福擊走之然軍還忽遠焚棄芻糧數十萬軍中訛言相剽掠失亡不可勝計所得北漢州縣復皆失之至鄭州謁

嵩陵而還世宗以違衆議破北漢兵自是政無大小  
皆親決百官受成而已河南府推官高錫上書諫曰  
四海之廣萬幾之衆雖堯舜不能獨治必擇人而任  
之今陛下以一身親之天下不謂陛下聰明睿智足  
以兼百官之任皆言陛下褊迫疑忌舉不信羣臣耳  
不若選能知人公正者以為宰相能愛民聽訟者以  
為守令能豐財足食者使掌金穀能原情守法者使  
掌刑獄陛下但垂拱明堂視其功過而賞罰之天下  
何憂不治何必降君尊而代臣職屈貴位而親賤事  
無乃失為政之本乎不從北漢主憂憤成疾悉以國  
事委其

**集覽**忻口鎮名在忻州之北屬太原忻州秀  
容縣成列而殿殿注見後梁主瑱貞明  
五年垂拱明堂垂拱注見齊明帝建  
武二年明堂注見漢武帝建元元年  
漢之鎮名在太原府  
忻州之北宋廢之

**質實**一統志云  
忻口五代

書法

世宗用兵皆書伐此其再書攻何漢辭直也故於蜀書伐於唐書伐於漢則書攻

秋七月周加吳越王弘俶天下兵馬都元帥○周以魏

仁浦為樞密使○周徐州奏為節度使王晏立碑許之

晏徐州滕縣人少嘗為羣盜及為節度使悉召故黨贈之金帛謂曰吾鄉素名多盜昔吾與諸君皆嘗為之想後來者無能居諸君之右諸君幸為我語之使勿復為為者吾必族之於是一境清肅徐人請為立碑許之

質實

一統志云滕縣隋初所置屬彭城郡後陞為滕郡唐復為滕縣屬徐州宋因之金陞

滕縣軍大定中改滕州及置滕縣元因之屬益都路至本朝初州廢以縣屬兗州府

書法

特筆也綱目書為臣立碑二而已魏徵書復立



冬十月周賜羽林大將軍孟漢卿死

漢卿坐納藁稅多取耗餘賜死有司奏漢卿罪不致死世宗曰朕知之欲以懲衆耳

發明 周世宗誠英主然用刑失之太重有如漢卿罪果當誅則誅之可也罪不可當誅而借其

死以懲衆毋乃不可乎此所以書賜死而復書其爵也

周簡閱諸軍募壯士以補宿衛

初宿衛之士累朝相承務為姑息不欲簡閱恐傷人情由是羸老居多但驕蹇不用命實不可用每遇大敵不走即降其所以失國亦多由此世宗因高平之戰始知其弊謂侍臣曰凡兵務精不務多今以農夫百未能養甲士一柰何浚民之膏血養此無用之物乎且健懦不分衆何所勸乃命大簡諸軍精銳者升

之上軍羸者斥去之又以驍勇之士多為諸道所蓄詔募天下壯士咸遣詣闕命我太祖皇帝選其尤者為殿前諸班其騎步諸軍各命將帥選之由是士卒精強所向克捷胡氏曰五代之主多刻於民而紆於軍世宗則嚴於軍而寬於民既得柄制輕重之權且其言曰兵務精不務多奈何浚民膏血養此無用之物聖人復起不能易矣

**書法**

常事耳何以書特筆也五代之世兵卒驕悍不敢簡汰久矣世宗力行之此兵之所以精

練而莫之敵

也故特書之

**發明**

前乎此蓋嘗聞賜諸軍優給賜將士緡錢矣未聞有所謂簡閱諸軍者而周主能行之士

卒精強征伐四克然則謂驕軍難於制御可不可乎書以予之宜矣

# 周罷諸道巡檢使臣

世宗謂侍臣曰諸道盜賊頗多蓋由累朝分命使臣巡檢致藩侯守令皆不致力宜悉召還專委節鎮州縣責其

清肅

## 十一月周河隄成

河自楊劉至於博州百二十里連年東潰分為二派匯為大澤瀰漫數百里又東北環古隄而出灌齊棣淄諸州漂沒田廬不可勝計流民采菰稗捕魚以給食久不能塞至是遣李穀按視隄塞役徒六萬三十日而集覽楊劉城名注見唐憲宗元和十三年匯為大澤匯戶賄反又音潰水回合也禹貢東匯澤為彭蠡注水東迴為彭蠡大澤菰稗菰本作菰雕菰也一名雕胡又名安湖今所食茭苗米也稗傍

卦反草屬也葉如稻

書法

凡成久辭也梁淮堰築作三年則書成此三十日畢耳其書成何美速成也綱目久成書

成速成書成是故周河隄速成書成周太廟速成書成戊午年

北漢主旻殂子鈞立

北漢主殂告哀于契丹契丹冊命承鈞為帝更名鈞鈞性孝謹既嗣位勤於為政愛民禮士境內粗安其事契丹表稱男契丹賜詔謂之兒皇帝

王逵以符彥通為黔中節度使

馬希萼之破長沙也府庫累世之積皆為淑州蠻酋符彥通所掠彥通由是富強稱王於谿洞間王逵遣

其將王虔朗撫之彥通見之禮貌甚倨虔朗厲聲責之彥通慙懼起謝虔朗因說之曰谿洞之地隋唐之世皆為州縣著在圖籍今足下上無天子之詔下無使府之命雖自王於山谷之間不過蠻夷一酋長耳曷若去王號自歸於王公王公必以天子之命授足下節度使與中國侯伯等夷豈不尊榮哉彥通大喜即日去王號獻銅鼓於王達達承制以彥通為黔中節度使以虔朗為都指揮使預聞府政

集覽

黔中注見周顯王七年

## 湖南大饑

是歲湖南大饑周行逢開倉以賑之全活甚衆行逢起於微賤知民間疾苦勵精為治嚴而無私辟署僚屬皆取廉介之士約束簡要吏民便之其自奉甚薄或譏其太儉行逢曰馬氏父子窮奢極靡不恤百姓

今子孫乞食於人又足效乎

乙周顯德二年○是卯歲凡五國三鎮

考異

按周世宗不改元此當分注周世宗崇仍稱顯德二年

# 春正月周制給漕運斗耗

自晉漢以來漕運不給斗耗綱吏多以虧欠抵死至是詔每斛給耗一斗胡氏曰漕運斗耗世宗興之善矣省耗應罷而未罷豈非以多故未及邪明宗潞王時可謂窘闕猶放通租數百萬世宗誠欲蠲除省耗又何集覽省耗舊制田稅每斛更輸二升謂之雀鼠難哉集覽耗漢隱帝時三司使王章始令更輸二斗謂之省耗

# 周遣使如夏州

李彝興以折德辰亦為節度使耻之塞路不通周使世宗謀於宰相對曰夏州邊鎮朝廷每加優借府州徧小得失不繫重輕且宜撫諭彝興與庶全大體世宗曰德辰數年以來盡力以拒劉氏奈何一旦棄之且夏州惟產羊馬貿易百貨悉仰中國我若絕之彼何能為乃遣供奉官齎詔書責之彝興惶恐謝罪

### 周制舉令錄法

初令翰林學士兩省舉令錄除官之日仍署舉者姓名若貪穢敗官並當連坐胡氏曰保任天下之至難也夫中人以上不萬一焉中人固不易得矣中人以下滔滔是也迫禍難處困窮臨勢利怵交黨此改行易守之會也中人者一出一入焉忍與不忍敢與不敢相權於中未至於甚忍而不忍之心勝怵迫甚矣不忍而敢之心決此人情之大常物理之必至也誠知其人今不為是安知其他日渝與不渝也而況其

下者乎故連坐之法似美而實弊似美故其初激昂  
實弊故其終廢格若曰君姑嚴為之防耳則姦人窺  
之其弊益甚然則奈何曰人君惟典學明道識拔真  
賢以為輔相則有成材之具得人之方如儲木於山  
育魚於淵惟君所取此非一日之力

**集覽**

保任句絕

也立法保任苟給目前策之下者也  
為官者或以兄任為官者謂之任子後漢楊秉傳任  
人及子弟為官注任保也怵迫怵雪律反韻會引廣  
韻注謏誅誘也謏先了反說文徐按賈誼鵬賦怵迫  
之徒當作此誅字漢書怵於邪說如淳曰見誘怵也  
怵音戌今俗猶云相謏怵又史記漢興以來諸侯年  
表諸侯或怵邪臣為淫亂索隱曰怵音誓訓習也案  
此說恐未當渝與不渝爾雅釋言曰渝變也郭  
璞注渝變易也廢格注見唐德宗貞元三年  
保任集覽以父兄任為官者謂之任子今按此謂薦  
舉人為官而保任其不為非也與任子法不同禮辟

正誤



今按辟  
徵召也

書法

舉令錄心書重近民也自齊書始用士人為縣令陳丙戌年是後舉堪為縣令書唐貞觀

三年引見京畿縣令書開元元年召縣令試理人策書四年敕舉縣令書九年頒令長新戒書二十四年制舉令錄法書是年縣令為理人之本綱目每詳書之

周浚胡盧河城李晏口以張藏英為沿邊巡檢使

契丹屢寇河北輕騎深入無藩籬之限郊野之民每因殺掠言事者稱深冀之間有胡盧河橫亘數百里可浚之以限其奔突詔王彥超韓通將兵夫浚之築城於李晏口留兵戍之世宗召張藏英問以備邊之策藏英具陳地形要害請列置戍兵募邊人驍勇者厚其廩給自請將之隨宜討擊從之藏英到官數月

募得千餘人彥超等視役嘗為契丹所圍藏英集覽

引兵馳擊大破之自是河南之民始得休息  
一統志云胡盧河在真定府寧晉縣東南源自順德府流經任縣至此匯為澤即大陸澤亦名廣阿澤

## 二月朔日食○周詔羣臣極言得失

詔曰朕於卿大夫才不能盡知面不能盡識若不采其言而觀其行審其意而察其忠則何以見器識之淺深知任用之得失若言之不入罪實在予苟求之不言咎將誰執

### 書法

前書詔百官上封事矣於是復書家教然也故書美之綱目書詔極言三漢明帝永平八

年唐太宗貞觀十一年

是年舍是無書者矣

唐以嚴續同平章事○三月蜀以趙季札為雄武監軍

使

周世宗常憤廣明以來中國日蹙及高平旣捷慨然有削平天下之志秦州民夷有獻策請恢復舊疆蜀主聞之遣客省使趙季札按視邊備季札質實一統素以文武才畧自任因以為雄武監軍使志云雄武軍五代時王建據蜀所置治金州宋初改為昭化軍屬利州路元廢軍以州屬興元路而本朝因之改屬漢中府

夏四月周廣大梁城

世宗以大梁城中迫隘詔展外城先立標幟今冬農隙興板築東作動則罷之更俟次年以漸成之且令自今葬埋皆出所標七里之外其標內俟分畫街衢倉場營廨之外聽民隨便築室民先侵街衢為舍皆

直而廣之又遷墳墓於標外曰怨謗之語朕自當之他日終為人利

# 周以王朴為諫議大夫知開封府事

世宗謂宰相曰朕每思致治之方未得其要寢食不忘又吳蜀幽并皆阻聲教未能混一宜命近臣著為君難為臣不易論及開邊策各一篇朕將覽焉比部郎中王朴獻策曰中國之失吳蜀幽并皆由失道今必先觀所以失之之原然後知所以取之之術其始失之也莫不以君暗臣邪兵驕民困姦黨內熾武夫外橫因小致大積微成著今欲取之莫若反其所為而已進賢退不肖以收其才恩隱誠信以結其心賞功罰罪以盡其力去奢節用以豐其財時使薄歛以阜其民俟羣才既集政事既治財用既充士民既附然後舉而用之功無不成矣彼之人觀我有必取之勢則知其情狀者願為間諜知其山川者願為鄉導

民心既歸天意必從矣凡攻取之道必先其易者唐與吾接壤幾二千里其勢易擾也擾之當以無備之處為始備東則擾西備西則擾東彼必奔走而救之奔走之間可以知其虛實強弱然後避實擊虛避強擊弱未須大舉且以輕兵擾之南人懦怯聞小有警必悉師以救之師數動則民疲而財竭不悉師則我可以乘虛取之如此江北諸州將悉為我有既得江北則用彼之民行我之法江南亦易取也得江南則嶺南巴蜀可傳檄而定南方既定則燕地必望風內附若其不至移兵攻之席卷可平矣惟河東必死之寇不可以恩信誘必當以強兵制之然彼自高平之敗力竭氣沮必未能為邊患宜且以為後圖俟天下既平然後伺間一舉可擒也今士卒精練甲兵有備厚下畏法諸將効力期年之後可以出師宜自夏秋蓄積實邊矣世宗欣然納之時羣臣多守常偷安所封少可取者惟朴神峻氣勁有謀能斷世宗重之以

為諫議大夫

知開封府事

書法

自五季以來唐河南漢周開封多以子弟尹

之世宗始用賢者而朴以諫議大夫領焉曰

知開封府事異其名也是故王徽以宰相書知京

兆尹事唐僖宗中和四年王朴以大諫書知開封

府事

# 五月周遣鳳翔節度使王景伐蜀

世宗謀取秦鳳求可將者王溥薦  
宣徽使向訓詔訓與景偕趣秦州

## 周廢無額寺院禁私度僧尼

敕天下寺院非敕額者悉廢之禁私度僧尼凡欲出家者必俟祖父母父父母伯叔父之命禁僧俗捨身斷

手足煉指挂燈帶鉗之類幻惑流俗者令諸州每歲造僧帳有死亡歸俗皆隨時開落廢寺院三萬餘所存者三千六百九十四見僧尼六萬餘人胡氏曰寺皆宜廢不為有敕額而可存僧不可度不為有尊長之命而可度殘身煉指之類固惑流俗比之無父無君則淺矣與其禁之無亦擇其重者乎是時僧尼合六萬餘人歸之南畝則力農也拘之尺籍則健卒也知百農未贍一兵而此六萬人者凡仰食幾農夫矣豈世宗未集覽幻惑以幻化之術蠱惑人也魚豢魏之思邪畧云黎軒多奇幻口中吐火自縛自解顏師古曰即今吞刀吐火植樹種瓜屠人截馬之術猶列于周穆王篇有化人來入水火貫金石反山川移城邑是已

# 書法

書善之也雖所廢者無額所禁者私度未能大快人意而所去已十之九矣終綱目書禁

私度僧尼二唐宣

宗大中元年是年

周拔蜀黃牛寨趙季札遁歸伏誅

王景拔黃牛等八寨季札懼不敢進先遣輜重及妓妾西歸單騎馳入成都衆以為奔敗莫不震恐蜀主怒遂斬之

六月周主親錄囚於內苑

有汝州民馬遇父及弟為吏所冤死屢經覆按不能自伸世宗臨問始得其實入以為神由是諸長吏無不親察

獄訟

書法

書嘉恤刑也終綱目書親錄囚六詳漢安帝永初二年舍是無書者矣



發明

英明之君其設施政事必有可觀世宗嗣統

至是纔二載書簡閱諸軍罷諸道巡檢使臣  
給漕運斗耗制舉令錄法詔極言得失及是親錄  
囚徒至明年又立二稅限是皆良法美意而世宗  
能行之雖欲不治奚可得哉  
此綱目所以比書而予之也

### 蜀遣使如唐及北漢

蜀主遣間使如北漢及唐欲與  
之俱出兵以制周二國皆許之

### 南漢主殺其弟弘政

於是高祖  
諸子盡矣

### 周以張美權點檢三司事

初世宗在澶州美堂州之金穀隸三司者世宗或私有所求美曲為供副至是以美治財精敏當時鮮及故以利權授之征伐四方用度不乏美之力也然思其在澶州所為終不以公忠待之

### 秋七月周以王景為西南招討使向訓為都監

宰相以景等久無功饋運不繼固請罷之世宗命我太祖皇帝往視之還言秦鳳可取之狀從之

### 九月周始鑄錢

世宗以縣官久不鑄錢而民間多銷錢為器皿及佛像錢益少敕立監采銅鑄錢唯法物軍器及寺觀鐘磬鉦鐸之類聽留外民間銅器佛像五十日內輸官受直過期匿五斤以上罪死不及者論刑有差謂侍臣曰佛以善道化人苟志於善斯奉佛矣彼銅像豈所謂佛邪且吾聞佛志在利人雖頭目猶捨以布施

若朕身可以濟民亦非所惜也司馬公曰若周世宗可謂仁矣不受其身而愛民若周世宗可謂明矣不以無益集覽立監立剏置也監去廢有益聲鑄錢之所曰錢監

## 周王景敗蜀師取秦階成州

蜀主遣李廷珪伊審徵拒周兵廷珪遣李進據馬嶺寨又遣奇兵屯白澗又分兵出鳳州之北絕周糧道閏月王景遣裨將張建雄將兵二千抵黃花又遣兵千人趣唐倉扼蜀歸路蜀將王巒與建雄戰敗奔唐倉遇周兵又敗馬嶺白澗兵皆潰廷珪等退保青泥嶺雄武節度使韓繼勲棄秦州奔還成都判官趙玘舉城降斜谷援兵亦潰成階二州皆降蜀人震恐世宗欲以玘為節度使范質固爭乃以為郢州刺史百官入賀世宗舉酒屬王溥曰邊功之成卿擇帥之力也世宗與將相食於萬歲殿因言兩日大寒朕於宮

中食珍膳深愧無功於民而坐享天祿旣不能躬耕而食惟當親冒矢石為民除害差可自安耳蜀李廷珪伊審徵請罪蜀主皆釋之致書請和于周世宗怒其抗禮不荅蜀主愈恐聚兵糧於劍門白帝為守禦之備募兵旣多用度不足始集覽斜谷注見漢成帝鑄鐵錢權鐵器民甚苦之元延三年褒斜權鐵器權注見漢武帝質實一統志云青泥嶺在鞏昌天漢三年權酒酤府城東四百八十里徽州界

# 冬十一月周遣李穀督諸軍伐唐

唐主性和柔好文華而喜人順已由是諛臣日進政事日亂旣克建州破湖南並驕有吞天下之志李守貞慕容彥超之叛皆為之出師又遣使通契丹及北漢約共圖中國然契丹利其貨徒以虛語相往來實

不為之用也。先是每冬淮水淺涸，常發兵戍守，謂之把淺。壽州監軍吳廷紹以疆場無事，罷之。清淮節度使劉仁贍固爭，不能得。至是，周以李穀為淮南前軍部署，王彥超副之，督侍衛都指揮使韓令坤等十二將以伐唐。胡氏曰：南唐欲圖中原而結契丹為援，又為二叛出師謀國，如此欲久存得乎？

### 周疏汴水質實

一統志云：汴水源出開封府滎陽縣大周山，合京索須鄭四水，東南至中牟縣

北入于

黃河

汴水自唐末潰決，自埽橋東南悉為污澤。世宗謀擊唐先命發民夫因故堤疏導之，東至泗上，議者皆以為難成。世宗曰：數年之後必獲其利。

### 周王景克蜀鳳州擒其節度使王環都監趙崇溥死之

王景等圍鳳州韓通分兵城固鎮以絕蜀之援兵遂克鳳州擒其節度使王環及都監趙崇溥等將士五千入崇溥不食而死詔將士願留者優其俸賜願去者給資裝四州稅外科徭悉罷之

書法

五季之世以死節書者十人裴約王彥章姚洪夏魯奇宋令詢沈斌輩廷美趙崇溥劉仁

賁張彥卿其一為都監蓋自唐制監軍以來一人而已綱目重死節特書予之

# 唐遣兵拒周師於壽州周師擊敗之

唐人聞周兵將至而懼劉仁贍神氣自若部分守禦無異平日衆情稍安唐主以劉彥貞為部署將兵二萬趣壽州皇甫暉姚鳳將兵三萬屯定遠召鎮南節度使宋齊丘還金陵謀國難周李穀等為浮梁自正陽濟淮王彥超敗唐兵

集覽

浮梁郭璞曰以舟相比二千餘人於壽州城下

曰浮梁謂連舟至岸也

左傳杜預注造舟為質實一統志云定遠梁之縣名梁則河橋之謂也

屬廣安郡南齊改郡曰大

安隋初罷郡改縣曰臨濠唐初復為定遠縣宋元仍舊至本朝因之改屬鳳陽府

### 周樞密使鄭仁誨卒

仁誨卒世宗欲臨其喪近臣奏歲道非便集覽歲道世宗曰君臣義重何日時之有往哭盡哀歲謂歲星道謂方道也歲又注見晉帝奕太和五年越得歲

### 吳越遣使入貢于周

吳越王弘俶遣使入貢于周周以詔諭之使出兵擊唐

丙周顯德三年○是春正月周以王環為驍衛大將軍長歲凡五國三鎮

賞其不

降也

# 周主自將伐唐大敗唐兵斬其將劉彥貞

世宗下詔親征淮南命侍衛都指揮使李重進將兵先赴正陽遂發大梁李穀攻壽州久不克唐兵救之又以戰艦數百艘趣正陽為攻浮梁之勢李穀謀曰我軍不能水戰若賊斷浮梁則腹背受敵皆不歸矣不如退守浮梁以待車駕世宗聞之亟遣使止之比至已焚島糧退保正陽矣世宗亟遣李重進引兵趣淮上李穀奏賊艦日進淮水日漲萬一糧道阻絕其危不測願且駐蹕陳頴俟重進至共渡賊艦可禦浮梁可完立具奏聞若但厲兵秣馬春去冬來亦足使賊中疲敝取之未晚世宗不悅劉彥貞素驕貴無才畧所歷藩鎮專為貪暴以賂權要由是魏岑等爭譽之故周師至唐主首用之聞李穀退喜引兵直抵正



陽劉仁贍及池州刺史張全約固止之曰公軍未至而敵人先遁是畏公之威聲也安用速戰萬一失利則大事去矣彥貞不從旣行仁贍曰果遇必敗乃並兵乘城為備李重進度淮逆戰大破彥貞斬之斬首萬餘級是時江淮久安民不習戰唐人大恐張全約收餘衆奔壽州仁贍表為左廂都指揮使皇甫暉姚鳳退保清流關世宗謂侍臣曰聞壽州圍解農民多歸村落今聞大軍至必復入城憐其聚為餓殍宜先遣使安撫

**集覽** 駐蹕車駕所止曰駐蹕蹕又注見漢各令安業

文帝三年警蹕厲兵秣馬左傳僖三十三年注厲兵嚴兵以待敵秣音未韻會

質實一統注厲兵摩厲以須也秣本作餼食馬穀也

質實志云清流關在滁州城西南二十里南唐所置地極險要今廢之

# 周以李重進為都招討使李穀判壽州行府事

周主攻唐壽州

世宗至壽州城下命諸軍圍之發丁夫數十萬以攻城晝夜不息命我太祖皇帝擊唐兵於塗山太祖遣百餘騎薄其營而偽遁伏兵邀之大敗唐兵於渦口斬其都監何廷錫等奪戰艦五十餘艘

集覽

塗山圖經所載塗山者四一會稽一渝州一濠州一當塗此塗山在濠州鍾離西九十五里禹會諸侯處也有禹會村鯀廟在焉方輿勝覽載東坡濠州塗山詩樵蘇已入黃熊廟烏鵲猶朝禹會村蓋按左傳昭七年昔堯殛鯀于羽山其神化為黃熊也又昭四年穆有塗山之會注周穆王會諸侯於塗山塗山在壽春東

質實

一統志云塗山在鳳陽府懷遠縣東南八里與荆山對峙禹娶于塗山即此山西南

有禹墟及禹會村蓋禹會諸侯之地渦口渦水之口也渦水源自黃河東流經鳳陽府蒙城縣沿懷遠縣

東北與淮水合流至臨淮縣蚌阜東入于海唐李吉甫云濠有渦口之險即此五代時為控扼之地矣

### 周詔王逵攻唐鄂州

逵引兵過岳州團練使潘叔嗣燕犒甚謹逵左右求取無厭譖叔嗣謀叛逵怒叔嗣不自安

### 二月周主命我太祖將兵襲唐滁州克之擒其將皇甫

### 暉姚鳳

下蔡浮梁成世宗自往視之命我太祖皇帝倍道襲清流關皇甫暉等驚走入滁州斷橋自守太祖躍馬度兵涉水直抵城下暉曰人各為其主願容成列而戰太祖笑而許之暉整衆而出太祖突陳擊暉擒之并擒姚鳳遂克滁州時宣祖為馬軍副都指揮使引兵夜至傳呼開門太祖曰父子雖至親城門王事也

不敢奉命明旦乃得入世宗遣翰林學士竇儀籍滁州帑藏太祖遣親吏取藏中絹儀曰公初克城時雖傾藏收之無傷也今既籍為官物非有詔書不可得也太祖由是重儀初永興節度使劉訥遺表薦其幕僚薊人趙普至是范質以為滁州判官太祖與語悅之時獲盜百餘人皆應死普請先訊鞫然後決所活什七八太祖益奇之太祖威名日盛每臨陣必以繁纓飾馬鎧仗鮮明或曰如此則為敵所識太祖曰吾固欲其集覽下蔡春秋成七年吳入州來注州來楚識之耳

淮南去安豐城二十里繁纓

邑淮南下蔡縣是今下蔡在淮北岸渡

注見周威烈王二十三年質實一統志云下蔡漢之縣名屬沛郡晉

屬淮南郡元魏屬揚州隋屬汝陰郡唐屬潁州宋省入安豐軍故城在鳳陽府壽州北三十里

書法

我太祖何趙匡胤也何以不名綱目朱熹所修而熹宋人也故為國諱臨文不諱此則曷

為諱之夫子作春秋諸侯卒皆名之至魯先

君則卒書公薨書葬我君某公則固諱之矣

發明

帝王之興其施為氣象自與常人不同是時

周世宗舉兵南伐而我太祖皇帝實任先鋒之寄滁州之戰皇甫暉乞容成列我太祖笑而許之其度量已異乎常人遠矣至於宣祖傳呼城門而太祖以王事不敢開竇儀籍滁州物不以應命而太祖由是重儀趙普全活疑獄而太祖益奇趙普凡若此類是皆帝王大度之事非惟同時將帥無之雖當代之君亦豈能有此宜乎興建大業高出前古殊非近代所能企及此綱目所以於太祖克滁之日備述於下則我太祖盛德大業蓋有由矣帝王自有真詎不信然歟

唐主請和于周周主不答

唐主遣泗州牙將齊書抵徐州稱唐皇帝奉書請息  
兵修好願以兄事周歲輸貨財以助軍費世宗不答  
**書法** 梁遣使求和魏主書不肯已丑年此其書不  
答何不肯者恐辭也不答者尊辭也不肯罪  
魏不答罪唐後書蜀  
主致書不答義同

### 周主遣韓令坤將兵襲唐揚州

世宗詞知揚州無備命韓令坤等將兵襲之戒以  
毋得殘民其李氏陵寢遣人與其人共守護之 集  
覽 陵寢古者宗廟前制廟後制寢至秦始出寢起於  
墓側故陵上稱寢殿有衣冠几杖象生之具以薦  
新物

### 書法

裴滌州嘗書周主命矣於是後書周主遣見  
廟謨之自上也若世宗者五代以來可謂英

主  
矣

# 唐主遣鍾謨李德明奉表于周

唐主以兵屢敗懼亡乃遣翰林學士鍾謨文理院學士李德明奉表稱臣請平于周獻御服茶藥及金銀器繒錦牛酒謨德明素辯口世宗知其欲游說盛陳甲兵而見之曰爾主自謂唐室苗裔宜知禮義異於他國與朕止隔一水未嘗遣一介修好惟泛海通契丹捨華事夷禮義安在且汝欲說我令罷兵邪我非六國愚主豈汝口舌所能移邪可歸語爾主亟來見朕再拜謝過則無事矣不然朕欲親觀金陵城借府庫以勞軍汝君臣得無悔乎二人戰栗不敢言

## 吳越遣兵襲唐常州

吳越營田使陳滿言於丞相吳程曰周師南征唐舉國驚擾常州無備易取也程言於吳越王弘俶請從之丞相元德昭曰唐大國未可輕也若我入唐境而周師不至能無危乎程固爭弘俶從之遣程督兵趣常州

### 周取唐揚州

韓令坤奄至揚州以數騎馳入城城中不之覺唐副留守馬延魯髡髮僧服而逃軍士執之令坤慰諭其民使皆安堵

### 唐滅故吳主楊氏之族

唐主遣園苑使尹延範如泰州遷吳讓皇之族于潤州延範以道路艱難恐其為變盡殺其男子六十人



還報唐主集覽 吳讓皇故吳王廢皇帝楊溥也

書法前書唐主 詰還故吳主于潤州矣又書唐主

為不書主據齊滅元氏周滅高氏隋滅宇文氏

皆斥書主罪不在上也或稱名或止稱主或止稱

周取唐泰州○岳州團練使潘叔嗣殺王逵迎周行逢

入朗州行逢討叔嗣斬之考異斬當

叔嗣屬將士而告之曰吾事令公至矣今乃信讒疑

欽定四庫全書

內批資治通鑑綱目

卷五十九

岳州使將吏迎武安節度使周行逢衆謂行逢必以

謂我與之同謀何以自明且侯逾年未晚也乃入朗

州自稱武平留後告于周以叔嗣為行軍司馬叔嗣

安節賊以誘之叔嗣遂行行逢迎候郊勞甚權叔嗣

入謁遣人執之立庭下責之曰汝為小校無大功王

拒吾命乎集覽 郊勞左傳僖三十三年自郊勞至于

三月周主行視水寨

世宗至肥橋自取一石馬上持之至寨以供礮從官

發連弩射之矢大如椽牙將張瓊以身蔽之矢中瓊

骨出之流血數集覽 破機石也俗作砲張晏曰范蠡

升神色自若集覽 破機石也俗作砲張晏曰范蠡

唐遣司空孫晟奉表于周

唐主以孫晟為司空遣與禮部尚書王崇質奉表于

周請奉正朔守土疆晟謂馮延巳曰此行當在左相

謂崇質曰君家百口宜為自謀吾思之熟矣終不負

於城上晟謂仁瞻曰君受國厚恩不可開門納寇世

欽定四庫全書

內批資治通鑑綱目

卷五十九

世宗集覽 奉正朔奉行周之正朔不自改制也改正

土未陵唐烈祖墓也一

南漢以宦者龔澄樞知承宣院

南漢甘泉宮使林延遇陰險多計數南漢主倚信之

即日用之

周取唐光舒蘄州○周遣李德明還唐唐主殺之

唐主使李德明孫晟言于周請去帝號割六州歲輸

金帛百萬以求罷兵世宗欲盡得江北之地不許德

號何爽歲寒儻堅事大之心終不迫人于險言盡於此更不煩云苟曰未然請從茲絕唐主復上表謝德明盛稱世宗威德及甲兵之彊勸唐主割江北之地唐主不悅宋齊丘以割地為無益德明輕訢言多過實國人亦不之信樞密使陳覺副使李徵古素惡晟及德明使王崇質異其言因譖德明賣國求利唐主大怒斬之

### 書法

蘇武留匈奴書使書還美守節也德明書使書還其美之歟咎唐也德明雖出使無功唐主殺之為過矣書還殺之所以志唐主之過也終綱目使書還三蘇武鄭元璚李德明

唐遣將軍柴克宏將兵救常州敗吳越兵遂引兵救壽州未至卒

吳程攻常州破其外郭執唐團練使趙仁澤送鐵塘  
仁澤見吳越王弘徽不拜責以負約弘徽怒扶其口  
至耳元德昭憐其忠為傳良藥得不死唐主恐吳越  
侵逼潤州以宣潤都督燕王弘冀年少徵還金陵部  
將趙鐸言於弘冀曰大王元帥衆心所恃逆自退歸  
所部心亂弘冀然之辭不就徵部分諸將為戰守之  
備龍武都虞候柴克宏再用之子也沈默好施不事  
家產雖典宿衛日與賓客博奕飲酒未嘗言兵時人  
以為非將帥才至是請效死行陳其母亦表稱克宏  
有父風可為將唐主乃以為右武衛將軍使救常州  
時唐精兵悉在江北克宏所將數千人皆羸老李徵  
古復以鎧仗之朽蠹者給之克宏訴於徵古徵古慢  
罵之衆皆憤恚克宏恬然至潤州徵古遣使召克宏  
以宋匡業代之弘冀謂克宏君但前戰吾當論奏乃  
表克宏才畧可以成功常州危在旦莫不宜中易主  
將克宏引兵徑起常州徵古復遣使召之克宏曰吾

計日破賊汝來召吾必姦人也命斬之使者曰受李  
樞密命而來克宏曰李樞密來吾亦斬之乃蒙船以  
幕匿甲士其中襲吳越營大破之斬首萬級匡業  
至克宏事之甚謹復請將兵救壽州未至而卒

書法

遂者何急國難也大夫無遂事必如是而後  
可以遂故雖未至猶書之書未至卒惜之也

綱目於五代卒小國臣

有三舍是無書卒者矣

# 唐主以其弟齊王景達為元帥將兵拒周師

唐主以景達為諸道兵馬元帥將兵拒周以陳覺為  
監軍使中書舍人韓熙載上書曰信莫信於親王重  
莫重於元帥安用監軍為哉不從遣鴻臚卿潘承祐  
諸泉建召募驍勇承祐薦許文稹陳德誠鄭彥華林  
仁肇

夏四月唐兵復取泰州進攻揚州

唐將軍陸孟俊將兵趣泰州周兵遁去進攻揚州韓令坤亦走世宗遣張永德將兵救之令坤乃還世宗又遣我太祖將兵屯六合太祖令曰揚州有過六合者折其足令坤始有固守之志

周主如濠州

世宗攻壽州久不克會大雨營中水深數尺死亡頗多糧運不繼乃議旋師或勸東幸濠州從之

周韓令坤敗唐兵於揚州擒其將陸孟俊殺之

初孟俊之廢馬希萼也滅故舒州刺史楊昭暉之族以其女美獻於希崇令坤入揚州希崇以遺令坤至是獲孟俊將械送行在楊氏在簾下忽撫膺慟哭曰孟俊昔殺我家二百口今見之請復其冤令坤乃殺

之

# 唐兵攻六合我太祖擊破之

唐齊王景達將兵濟江距六合二十餘里設柵不進諸將欲擊之我太祖曰吾衆不滿二千若往擊之彼必見吾衆寡矣不如俟其來而擊之破之必矣居數日唐出兵趣六合太祖奮擊大破之殺獲近五千人溺死甚衆於是唐之精卒盡矣是戰也將士有不致力者太祖陽為督戰以劍斫其皮笠明日徧閱其笠笠有劍跡者數十人皆斬之由是部兵莫敢不盡死

# 周主如渦口

渦口作新浮梁成世宗幸之欲遂至揚州范質等以兵疲食少泣諫而止世宗嘗怒竇儀欲殺之質入救

之世宗起避之質趨前伏地叩頭曰儀罪不至於死  
臣為宰相致陛下枉殺近臣罪皆在臣繼之以泣世  
宗意解乃釋之

五月唐敗福州兵於南臺江質實

一統志云南臺江在福州府城南一十五

里江詩有越王釣龍臺因名源出建陽分水嶺東流七  
百里至臺又東南三十里與江東西峽合流入海晉郭  
璞遷城記南臺沙合河口  
路通先出狀元後出相公

發明

唐方困於周師而乃擊兵閩越  
據事直書亦足以見其繆也

○周主還大梁留李重進圍壽州○六月唐劉仁贍擊

周將李繼勲敗之○唐遣員外郎朱元將兵復江北諸

州

元因奏事論用兵方畧

唐主以為能故用之

# 秋七月周以周行逢為武平節度使

周以行逢為武平節度使制置武安靜江等軍事行逢留心民事悉除馬氏橫賦貪吏猾民為民害者皆去之擇廉平吏為刺史縣令朗州民夷雜居將卒驕惰一以法治之無所寬假衆怨且懼有大將與其黨十餘人謀作亂行逢知之大會諸將於坐中擒之數曰吾惡衣糲食正為汝曹何負而反今日之會與汝訣也立搗殺之坐上股栗行逢曰諸君無事皆宜自安樂飲而罷行逢多計數善發隱伏然性猜忍常遣人密詞諸州事聞邵州刺史劉光委多宴飲曰光委聚飲欲謀我邪召還殺之衡州刺史張文表獨以歲



時饋獻謹事左右得免行逢妻鄧氏陋而剛決善治  
生嘗諫行逢用法太嚴行逢怒鄧氏因之村墅遂不  
復歸行逢屢遣迎之不至一旦自帥僮僕來輸稅行  
逢就見之曰夫人何自苦如此鄧氏曰稅官物也公  
不先輸何以率下且獨不記為里正代人輸稅以免  
楚撻時邪行逢欲與之歸不可曰公誅殺太過一旦  
有變村墅易為逃匿耳行逢堦唐德求補吏行逢曰  
汝才不堪為吏吾今私汝則可矣汝居官無狀吾不  
敢以法貸汝則親戚之恩絕矣與之耕牛農具而遣  
之前天策府學士徐仲雅自馬希廣之廢杜門不仕  
行逢慕之署節度判官仲雅辭疾行逢迫脅固召之  
而授文牒終辭不取行逢怒放之邵州竟不能屈胡  
氏曰周行逢為政有足稱者徐仲雅既蒙禮辟豈不  
可出身相佐以靖一方乃能守節尚志終不肯屈求  
之當時鮮其比矣可不為賢乎馮道歷事五代  
之君朝同夕異其有愧於仲雅豈可數量哉

集覽

禮辟辟必並反辟除  
也禮遇而辟除之

唐朱元等取舒和蘄州周揚滁州守將皆棄城并兵攻

壽州

初唐人以茶鹽疆民而徵其粟帛謂之轉徵又興營田於淮南民甚苦之及周師至爭奉牛酒迎勞而將相不之恤專事俘掠民皆失望相聚山澤操農器為兵積紕為甲時人謂之白甲軍周兵討之屢為所敗所得諸州多復為唐有淮南節度使向訓奏請以廣陵之兵併力攻壽春詔許之訓封府庫以授主者命牙將分部按行城中秋毫不犯州民感悅軍還或負糗糒以送之滁州守將亦棄城引兵趣壽春唐諸將請據險以邀周師宋齊丘曰如此則怨並深不如縱之以德於敵則兵易解也乃命諸將自守毋得擅出

由是壽春之圍益急齊王景達軍于濠州遙為聲援  
軍政皆出於陳覺擁兵五萬無決戰意將吏畏之無  
敢言者

### 八月周作欽天曆

王朴與司天少監

王處訥所撰也

九月周以王朴為樞密副使○冬十月周立二稅起徵  
限

世宗謂侍臣曰近朝徵斂穀帛多不俟時收穫紡績  
之畢乃詔三司自今夏稅以六月秋稅以十月起徵  
民間便之

周山南東道節度使安審琦入朝除太師遣還鎮

審琦鎮襄州十餘年至是入朝除守太師遣還鎮審琦感悅世宗謂宰相曰近朝多不以誠信待諸侯雖有欲效忠節者其道無由王者但能毋失其信何患諸侯不歸心哉  
集覽除守太師拜守者出於特旨所置與正員資格同太師古官天子所師法

周將張永德敗唐兵於下蔡○周以我太祖為定國節度使兼殿前都指揮使

太祖表趙普為節度推官

十一月周殺唐使者司空孫晟

張永德與李重進不相悅永德密表重進有二心世宗不之信時二將各擁重兵衆心憂恐重進一日單騎詣永德營從容宴飲謂永德曰吾與公幸以肺腑俱為將帥奚相疑若此之深邪永德意解衆心亦安唐主聞之以蠟書誘重進皆誘毀反間之語重進奏之初唐使者孫晟鍾謨從至大梁世宗待之甚厚時召見飲以醇酒問以唐事晟但言唐主畏陛下神武事陛下無二心及得唐蠟書召晟責之晟正色抗辭請死問以唐虛實默不對命都承旨曹翰送晟於右軍巡院與之飲酒從容問之晟終不言翰乃謂曰有敕賜相公死晟神色怡然索靴袍整衣冠南向拜曰臣謹以死報國乃就刑并從者百餘人皆殺之貶鍾謨耀州司馬既而憐晟忠節集覽肺腑注見漢武悔殺之召謨拜衛尉少卿

帝元朔六年

集覽肺腑注見漢武

書法

孫晟可謂不辱君命矣不書死之何過周也晟書死之則無以見周殺行人之失矣然則

何以勸節守其死其殺

皆具官所以予晟也

發明

孫晟能盡忠所事故特書官書使者以美之明其不失將命之職也然美在使者則譏在

於主  
人矣

周召華山隱士陳搏詣闕尋遣還山質實

一統志云華山在西安府

華陰縣南一十里即西嶽也白虎通云西方太陰用事萬物生華故曰華山

世宗召陳搏問以飛升黃白之術對曰陛下為天子當以治天下為務安用此為乃遣還山詔州縣長吏常存問之胡氏曰陳搏之蘊非世宗所知也飛升黃白之問不亦陋乎搏以治天下對已發其端世宗不能訪以集覽飛升黃白之術注見漢治道也  
光武建武中元元年

書法

召未有書隱士者雖武攸緒不書此其書何善博也何善之世宗以飛升黃白問而博以

治天下對

是以善之

發明

博非偽隱沽譽為仕宦捷徑者故特以華山隱士書之

周城下蔡

丁周顯德四年○北漢天會  
巳元年○是歲凡五國三鎮

春正月唐遣兵救壽州周

師擊破之

唐壽州城中食盡齊王景達遣許文稹邊鎬朱元將  
兵數萬救之軍于紫金山列十餘寨與城中烽火相  
應又築甬道運糧綿亘數十里將及壽春周李重進  
邀擊大破之死者五千人奪其二寨劉仁贍請以邊

鎬守城自帥衆決戰景達不許仁贍憤悒成疾其幼  
子崇諫夜泛舟渡淮為小校所執仁贍命腰斬之監  
軍使周廷構哭於中門以救之不許廷構復使求救  
於夫人夫人曰妾於崇諫非不愛也然軍法不可私  
名節不可虛若貸之則劉氏為不忠之門妾與公何  
面目見將士乎趣命殺之然後成喪將士皆感泣周  
人以唐援兵尚強多請罷兵世宗疑之李穀寢疾使  
范質王溥就問之穀曰壽春危困破在旦夕若鑾駕  
親征則將士爭奮必可下矣

### 集覽

紫金山在安豐路壽春縣南或云即八公山甬道注見漢王劉

邦二年鑾駕注見

### 質實

一統志云紫金山在鳳陽府壽州東北一十里山有車轍

馬跡謂淮南王安賓客之遺蹟世傳昔有人獲小金  
牌可以療病疑為丹砂所化周世宗大破南唐軍於  
紫金山

即此



## 二月周更造祭器祭王

命國子博士聶崇義

討論制度為之圖

## 三月周主復如壽州大破唐兵唐元帥景達奔還

先是唐水軍銳敏周人無以敵之世宗以為恨反自壽春於大梁城西汴水側造戰艦數百艘命唐降卒救北人水戰數月之後縱橫出沒殆勝唐兵至是車駕發大梁命王環將之自閩河沿潁入淮唐人大驚三月世宗度淮抵壽春城下躬擐甲胄軍於紫金山南命我太祖擊唐寨破之斷其甬道由是唐兵首尾不能相救朱元恃功頗違節度陳覺與元有隙屢表元反覆不可將兵唐主以楊守忠代之元憤怒欲自殺客宋瑄說之曰大丈夫何往不富貴何必為妻子死乎元即舉寨萬餘人降周世宗慮其餘眾沿流東

潰遽命指揮使趙晁將水軍數千沿淮而下命諸將  
擊唐紫金山大破之殺獲萬餘人擒許文稹邊鎬楊  
守忠餘衆果東世宗自將騎數百與諸將夾岸追之  
水軍中流而下唐兵戰溺死及降者殆四萬人獲船  
糧糧以十萬數劉仁贍聞援兵敗扼吭歎息景達  
陳覺皆奔歸金陵惟陳德誠全軍而還唐主議自督  
諸將拒周中書舍人喬匡舜上疏切諫  
唐主以為沮衆流撫州既而竟不敢出  
文也注撰胡貫反貫也客宋庠  
宋庠朱元門客也庠巨致反

集覽 躬撰甲  
胄左傳

唐壽州監軍周廷構以城降周唐節度使劉仁贍死之  
周以壽州為忠正軍徙治下蔡

世宗耀兵於壽春城壯唐清淮節度使劉仁贍病甚  
不知人監軍使周廷構等作仁贍表昇仁贍出城以

降于周仁贍卧不能起世宗慰勞賜資復令入城養疾徙壽州治下蔡赦州境死罪以下民受唐文書聚山林者並令復業政令有不便者令本州條奏又制曰劉仁贍盡忠所事抗節無虧前代名臣幾人堪比朕之伐叛得爾為多其以為天平節度使兼中書令是日卒追賜爵彭城郡王唐主聞之亦贈太師世宗復以清淮軍為忠正軍以旌仁贍之節

書法

上書唐壽州監軍周廷構降矣節度使劉仁贍之為唐可知也其再書唐何重予仁贍也

仁贍終身唐臣憤悵至死再書唐所以明其心之為唐也故雖以疾死書曰死之此特筆也一人而已矣繼書周以壽州為忠正軍辭繁

不殺所以重予之也

詳宋已未年

發明

書監軍以城降則見仁贍未嘗降也仁贍實以病終而直書死之者所以著其不屈之節

也

# 周主之父光祿卿致仕柴守禮犯法周主不問

守禮及當時將相王溥王晏韓令坤之父遊處恃勢恣橫洛人畏之謂之十阿父世宗既為太祖嗣人無敢言守禮子者但以元舅處之優其俸給未嘗至大梁嘗以小忿殺人有司不敢詰世宗知而不問胡氏曰世宗不知其姓出於柴氏而守禮又亡則無責矣其父固在乃以元舅處之果何義也然則宜奈何為郭氏立後封以大國如周之祀宋得用天子禮樂以不忘撫愛富貴之恩而復姓曰柴尊守禮為太上皇立柴氏宗廟以別生分類正本始以示天下則其道並行而不相悖矣歐陽公以守禮殺人世宗不問為寧受屈法之過以申父子之道夫既以元舅處之何名為父子且曰刑一人未必能使天下無殺人殺其

父則滅天姓孰為重夫事固皆當權輕重而執其中然非可以殺父而論之也故孟子發明父子之重至以天下為敝屣

**集覽**

如周之祀宋周既克殷封夏後

乃可與權者矣

宋皆天子之事守也

蓋禮樂車服在焉別生分類書

舜典後序文也注生姓也別其姓族分其類使相從

也別彼列友分扶問反以天下為敝屣屣通作蹤孟

子盡心上桃應問曰舜為天子瞽瞍殺人則如之何

孟子曰舜視棄天下猶棄敝蹤也竊負而逃終身訢

然樂而忘天下注孟子謂舜視棄天下如捐棄敝蹤

蹤草履也敝喻不惜使瞽瞍誠殺人舜必私竊負荷

其父而遠逃亦將自得其樂而忘天下之為貴也

**書法**

周主之父何罪周主也曷為罪之父至殺人

問為悖道不問為屈法則不正名之過也正

名其父奉之別官守禮雖暴豈至橫於外哉身為

天子父為列卿而處於遠外使得以小忿殺人失

在於不正名不在於不問也故書曰周主之父光祿卿致仕父紀實也光祿卿譏非名也致仕譏在外也

發明

父有天下傳歸於子子有天下尊歸於父此理之正也然父有天下或無子之可傳子有

天下或難於尊其父豈非禮之變乎夫堯授天下於舜舜固有瞽瞍存焉然舜不敢尊其父而君之者天下者堯之天下舜不得以私其父也舜雖不敢以私其父而孝養之禮則有加焉父其父而不敢君其父此舜之所以為大孝也桃應嘗問孟子瞽瞍殺人則如之何豈知舜之為子固不使瞽瞍有殺人之惡此正虞書所謂烝烝乂不格姦者舜處之有道也如使舜為天子瞽瞍至於殺人則舜固不足為舜矣柴世宗繼郭氏之周而其父至以小忿殺人則世宗所以處之者未盡其道爾守禮

之悖未如瞽瞍之頑瞽瞍猶不殺人而守禮顧乃  
殺人豈非世宗事父之孝有愧於舜乎誠使世宗  
為父築宮處之嚴密之地盡其父事之禮則守禮  
居移養移寧不自知愛重又烏有殺人之事哉是  
時郭氏既亡世宗尊臨九五固可少行其志豈有  
身為天子而其父與凡臣等且置之別都押伍羣  
小未嘗一至京闕則是世宗不父其父而天性之  
道亡矣又胡怪其有殺人之事哉故綱目於此不  
書元舅而特書周主之父者不予周人舅之也書  
爵書姓名者惡周主之臣其父也又書犯法周主  
不問者譏其父已殺人而猶置之不問不能迎致  
京師而奉養之使之得其所也書法若此周主雖  
欲曲辭其責  
尚可得哉吁

周開壽州倉賑饑民○夏四月周主還大梁○周宦者

# 孫延希伏誅

周修永福殿命延希董其役世宗至其所見  
役徒有削柿為匕瓦中噉飯者大怒斬延希  
為七柿當作柿芳吠反  
所木札也匕取飯匙  
集覽削柿

# 周罷懷恩軍遣還蜀

周之克秦鳳也以蜀兵為懷  
恩軍至是遣八百餘人西還

# 周以唐降卒為懷德軍

凡六軍三

十指揮

# 周疏汴水入五丈河質實

一統志云五丈河在開封府  
滎陽縣南三十五里大周山



下談苑曰京水自滎陽踰汴東北  
注河通山東之漕其廣五丈故名

自是齊魯舟楫  
皆達於大梁

### 五月周作刑統

詔以律令文古難知勅格煩雜不一  
命侍御史張滉等訓釋刑定為刑統

集覽

滉承  
職反

### 唐敗周兵斷其浮梁

唐郭廷謂將水軍斷渦口浮梁又襲敗  
武行德于定遠唐以廷謂為應援使

書法

特筆也攻守之際事有關於勝敗者綱目必  
特書之是故漢斷蜀浮橋書建武十一年唐

斷周浮梁

書是年

六月蜀衛聖都指揮李廷珪罷

蜀人多言廷珪為將敗覆不應復典兵蜀主罷之李太后以典兵者多非其人謂蜀主曰吾昔見莊宗跨河與梁戰及先帝在太原平西蜀諸將非有大功無得典兵故士卒畏服今王昭遠出於廝養伊審徵韓保貞趙崇韜皆膏粱乳臭子素不習兵徒以舊恩寘於人上平時誰敢言者一旦疆場有事安能禦大敵乎以吾觀之惟高彥儔太原舊人終不負汝自餘無足任者蜀主不能從

周以王祚為潁州團練使

祚溥之父也溥為宰相祚有賓客溥常朝服侍立客坐不安席祚曰純天不足為起

秋七月周貶武行德李繼勲為左右衛將軍

治定遠壽

春之敗也

# 北漢初立七廟

書法

前書吳始作太廟漢後主延熙十八年志慢

也此其書初何起辭也北漢稱帝七年始立

七廟則蜀為起之自稱帝以來再書伐周一書攻

一書擊甲寅以後一再受兵不無事矣大讐未復

其緩有可亮者

故起之止書初

## ○八月周平章事李穀罷以王朴為樞密使

穀卧疾二年九表辭位罷守本官

令每月有與一詣便殿議政事

## 蜀主致書于周周主不答

周所遣懷恩軍至成都蜀主亦遣梓州所俘八十人東還且致書謝請通好世宗以其抗禮不答蜀主聞之怒曰朕為天子郊祀天地時爾猶作賊何敢如是

## 九月周以竇儼為中書舍人

儼上疏請令有司討論禮儀考正鍾律作通禮正樂又以為政之本莫大擇人擇人之重莫先宰相自有唐之末輕用名器始為輔弼即兼二公僕射之官故其未得之也則以趨競為心既得之也則以容默為事乞令宰相各舉所知且令以本官權知政事期歲之間察其職業果能堪稱其官已高則除平章事未高則稍更遷官權知如故若有不稱則罷其政事責其舉者又班行之中有員無職者大半乞量其才器授以外任考其治狀能者進之否者黜之又請令盜賊自相糾告以其所告貨產之半賞之或親戚為

之首則論其徒侶而赦其所首者如此則盜不能聚矣又新鄭鄉村團為義營各立將佐一戶為盜累其一村一戶被盜罪其一將每有盜發則鳴鼓舉火丁壯雲集盜少民多無能脫者由是一境獨清請令他縣皆效之亦止盜之一術也又累朝屢詔聽民廣耕止輸舊稅及其既種則有司履畝而增之故民皆疑懼而田不加闢夫為政之先莫如敦信信苟著矣則田無不廣田廣則穀多穀多則藏之民猶藏之官也又言陛下南征江淮威靈所加前無強敵今以衆擊寡以治伐亂勢無不克但行之貴速則彼民免俘馘之災此民息轉輸之困矣

集覽

作通禮正樂全本作

世宗善之嚴儀之弟也

討論古今禮儀作大

周通禮考正鍾律作大周正樂新鄭今鈞州屬縣在

河南史記鄭世家周宣王庶弟友初封鄭索隱曰鄭

縣屬京兆至武公東徙河南故名

新鄭俘馘注見梁武帝大通元年

質實

一統志云新鄭古邑名周

封黃帝後於此為鄆國春秋時為鄭武公之國名曰新鄭秦屬潁州郡漢始置新鄭縣屬河南郡晉省劉宋復置屬滎陽郡後魏省隋復置唐宋皆屬鄭州金屬鈞州元仍舊至本朝因之改屬開封府

### 冬十月周設賢良經學吏理等科

書法

前書唐置科舉矣既罷乃復於是書周設諸科善之也五季之君僅有此耳故書予之

北漢麟州降周周以其刺史楊重訓為防禦使質實一統

志云麟州唐開元初所置後改為新秦郡乾元初復為麟州宋建隆初陞為建寧軍端拱初改為鎮西軍元改為雲州後改為神木縣  
本朝因之改屬延安府  
○十一月周主自將伐唐攻濠

泗州

世宗自將伐唐十一月攻破濠州闕城拔其水寨焚戰船七十餘艘斬首二千餘級又攻拔其羊馬城城中震恐唐團練使郭廷謂上表言臣家在江南今若遽降恐為唐所種族請先遣使稟命然後出降許之唐戰船數百艘在浹水東欲救濠州世宗自將兵夜發擊破之鼓行而東所至皆下至泗州我太祖先攻其南因焚城門破水寨世宗居月城樓督將士攻城

**集覽**

種族恐我之種類皆被唐族滅之也

# 契丹北漢會兵寇周潞州不克而還

契丹遣其侍中崔勲將兵來會北漢欲同入寇北漢主遣李存瓌將兵會之南侵潞州至其城下而還北漢主知契丹不足恃而不敢遽與之絕贈送勲甚厚

## 書法

契丹北漢嘗書伐周矣此其書寇何周既再傳國方有道夷德無厭而從之猾夏故并寇

之存中國  
尊有道也

發明

綱目不殊契丹與北漢前固已論之矣然始焉書伐繼書擊至是遂書寇者合異類以殘

中國此固春秋所不予者也疲民以逞躋躅不已果何為哉

十二月唐泗州降周周主遣擊唐兵至楚州大破之

泗州守將范再遇舉城降周世宗自至城下禁軍中  
島蕘者毋得犯民田民皆感悅爭獻芻粟無一卒敢  
擅入城者唐戰船數百艘保清口世宗自將追至楚  
州西北大破之我太祖擒其應援使陳承昭以歸唐  
之戰船在淮上  
者於是盡矣

唐濠州降周周主進兵攻楚州遣兵取揚泰州



郭廷謂使者自金陵還知唐不能救命參軍李延鄒  
草降表延鄒責以忠義廷謂以兵臨之延鄒擲筆曰  
大丈夫終不負國為叛臣作降表廷謂斬之舉城降  
周世宗時攻楚州廷謂來謁世宗謂曰江南諸將敗  
亡相繼獨卿能斷渦口浮梁破定遠寨所以保國足  
矣使將濠州兵攻天長遣指揮使武守琦將騎數百  
趨揚州至高郵唐人悉焚揚州官府民居驅其人南  
渡江後數日周兵乃至世宗聞泰州亦無備遣兵襲  
之取

南漢遣使入貢于周不至

南漢主聞唐屢敗憂形於色遣使入貢于周為湖南  
所閉乃治戰船修武備既而縱酒酣飲曰吾身得免  
幸矣何暇  
慮後世哉

戊周顯德五年。唐中興元年。南漢主  
午鑑大寶元年。是歲凡五國三鎮。

春正月周師克

唐海州。○周鑿鸛水引戰艦入江質實。

一統志云鸛水在淮安府城西

一名老鸛河。周世宗至北神堰齊雲艦大不能前進。遂開此河以通其道。

世宗欲引戰艦自淮入江。阻北神堰不得渡。欲鑿楚州西北鸛水以通其道。遣使行視還。言地形不便計功甚多。乃自往視之。授以規畫。旬日而成。用功甚省。巨艦數百艘皆達于江。唐人大驚。以為神。

周師拔唐靜海軍質實。

一統志云靜海軍五代時南唐所置。治靜海縣。周改為通州。宋

初改為崇州。後復為通州。屬淮南東路。元改為通州。路後復為州。屬揚州。路至本朝仍為州。以靜海縣省入屬

揚州府。

周拔靜海軍始通吳越之路先是世宗遣使如吳越語之曰卿去雖汎海還當陸歸已而果然

### 蜀貶章九齡為維州參軍

蜀右補闕章九齡見蜀主言政事不治由姦佞在朝蜀主問姦佞為誰指李昊王昭遠以對蜀主怒貶之

### 周主克唐楚州唐防禦使張彥卿死之

周兵攻楚州踰四旬唐防禦使張彥卿固守不下世宗自督諸將攻克之彥卿與都監鄭昭業猶帥衆拒戰矢刃皆盡彥卿舉繩牀以鬪而死所部千餘人至死無一人降者胡氏曰臣之事君格其非心禍狹者宜廓以寬弘急促者宜導以紓緩世宗之短李穀范質王溥王朴二三大臣所當濟其不及而泄其過也太平之功非一日所能就而世宗意在速成故威武雖暢而德信未下觀楚州之不下而甘心盡死如此

則亦異於雲霓之望時雨之師矣

**集覽**

繩牀其制本自虜來始名

故圖大業者速成不若美成也

胡牀晉桓伊下馬踞胡牀是也隋以識有胡字改名交牀唐柴紹擊西戎據胡牀使兩女子舞則唐史臣追本語以書也唐穆宗見群臣於紫宸御大繩牀則又名繩牀矣見詩話論繩牀之義

**書法**

前書仁贍此書彥卿唐不為無人矣終綱目書死之者五十有四唐居二人焉舍是無書

死之者矣

高保融以水軍會周師伐唐○二月周主至揚州○北漢攻周隰州不克

隰州刺史暴卒建雄節度使楊廷璋謂都監李謙溥曰今大駕南征澤州無守將河東必生心若奏請待

報則孤城危矣即牒謙溥權隰州事謙溥至則修守備未幾北漢兵果至諸將請速救之廷璋曰隰州城堅將良未易克也北漢攻城久不下廷璋度其疲困無備潛與謙溥約各募死士百餘夜襲其營北漢兵驚潰

解去

三月唐以太弟景遂為晉王燕王弘冀為太子考異

以當

作廢太弟上漏其  
字燕字上漏立字

景遂前後十表辭位且言弘冀嫡長有軍功宜為嗣唐主乃立景遂為晉王洪州大都督以弘冀為皇太子參決庶政弘冀為人猜忌嚴刻景

集覽

洪州本漢豫章郡也

遂左右有未出東宮者立斥逐之  
隋置洪州星子志云隋文帝以三皇時有異人洪崖居此因名洪州後宋孝宗隆興府今改隆作龍

質實

一統志云洪州隋初所置大業初改為豫章郡唐復為洪州置都督府天寶初改豫章郡後以

避諱止稱章郡乾元初復為洪州建中以後改為江南西道觀察使治所南唐遷都於此改州為南昌府宋復為洪州宣和中於此置安撫使隆興初隆興府元置隆興路至本朝初改洪都府尋復為南昌府

隸江

西道

周主臨江遣水軍擊唐兵破之唐主遣使盡獻江北地  
周主罷兵引還

世宗如迎鑾鎮屢至江口遣水軍擊唐兵破之唐主恐遂南渡又耻降號稱藩乃遣陳覺奉表請傳位於太子弘冀使聽命於中國時淮南惟廬舒蘄黃未下覺見周兵之盛白世宗請遣人渡江取表獻四州之

地畫江為境以求息兵辭指甚哀上曰朕本興師止取江北今爾主能舉國內附朕復何求賜唐主書稱皇帝恭問江南國主慰納之唐主奉表稱唐國主請獻江北四州歲輸貢物數十萬於是江北悉平得州十四縣六十世宗賜唐主書諭以今當罷兵不必傳位賜錢弘殷高保融犒軍帛有差唐主遣馮延巳獻銀絹錢茶穀共百萬以犒軍敕故淮南節度使楊行密昇府節度使徐溫等墓並量給守戶其江南群臣墓在江北者亦委長吏以時檢校胡氏曰韓熙載之走江南也李穀送別各言所志穀之言酬而熙載之言不應熙載文士高談非李穀沈毅有志畧之比也然自昔都江南者例不能北取中原豈皆文士無用邪曰天下形便無常勢而經營大業有常理漢高光唐太宗皆櫛風沐雨惡衣菲食躬環甲冑跋履山川其勤既如彼知人善任修政愛民令問日彰衆情歸戴其德又如此是以雖初無分地皆不五六年而成

帝業彼六朝南唐之君能如是乎若謂江南之人柔脆不可用於北方則不然矣項籍以吳中八千子弟橫行天下李陵以荆楚步卒當單于數十萬而宋高祖西取秦東取燕所向無敵亦皆江南人也孰謂其不可

**集覽**

迎鑾鎮今真州是五代時僞吳置迎鑾鎮

用乎

後宋改建安軍割揚州之永正六合二縣

隸焉至真宗陞真州櫛風沐雨莊子天下篇昔者禹之湮洪水沐甚雨櫛疾風郭象注櫛梳也冒驟雨而沐髮衝疾風而梳頭分地注見漢光武建

**質實**

一統志云

武五年分土六朝三國吳東晉宋齊梁陳迎鑾鎮南唐所置治永正縣宋初陞為建安軍太中祥符間陞軍為真州治揚子縣政和中號郡曰儀真元至元中改真州路後復為真州至本朝改為儀真縣以揚子縣省入改屬揚州府楊行密墓在揚州府儀真縣西七十里五代史唐末楊溥僭國號吳追尊其父行密為太武皇帝墓號興陵徐溫墓在鎮江府



丹徒縣東二十五里五代史唐末徐溫少從楊行密起兵以功封齊國公鎮潤州及吳建國拜大丞相封

東海

郡王

### 周汴渠成

浚汴口導河流達于淮

於是江淮舟楫始通

### 夏四月周新作太廟成

書法

晉武之篇書太廟成志慢也太康十年此其書太廟成何美之也曷為美之四月作之四

月成之其急宗廟可知也與限九月而後營營二十月而後成者大異矣綱目久成書成速成書成終綱目書

廟成二

五月朔日食○唐主更名景去帝號奉周正朔

唐主避周諱更名景下令去帝號稱國主凡天子儀制皆有降損去年號用周正朔平章事馮延巳嚴續樞密使陳覺皆罷初延巳以取中原之策說唐主由是有寵嘗笑烈祖鯁鯁曰安陸所喪纔數千兵為之輟食咨嗟者旬日此田舍翁識量耳安足與成大事豈如今上暴師數萬於外而擊毬宴樂無異平日真英主也與其黨談論常以天下為己任更相唱和翰林學士常夢錫屢言延巳等浮誕不可信唐主不聽夢錫曰姦言似忠陛下不悟國必亡矣及是延巳之黨相與言有謂周為大朝者夢錫大笑曰諸君常欲致君堯舜何意今日集覽烈祖鯁鯁烈祖南唐王徐自為小朝耶衆嘿然詰也鯁乙角反鯁初角反鯁鯁急迫局鯁貌鯁通作握鯁通作齧亦作齧西漢酈食其傳諸侯皆齧齧自用又司馬相如傳委瑣握

躡安陸所喪安陸郡名西魏置安州後宋陞德安府  
在湖北路時南唐烈祖遣李承裕與晉戰於安陸兵  
敗失亡四千餘人唐主悅恨質實一統志云安陸劉  
累日事在晉高祖天福五年宋之郡名治安陸  
縣西魏置安州後周改為潁州隋復為安陸郡唐初  
復為安州尋改為安陸郡乾元初復為安州又置安  
黃節度觀察使于此五代梁置宣威軍後唐改安遠  
軍晉為防禦州後漢復為安遠軍周復為防禦州宋  
初復置安遠軍後陞為德安府元初隸鄂州行  
省後隸黃州路至本朝改為德安府隸湖廣道

周主遣使如唐餽之鹽還其俘

周始命太府卿馮延魯衛尉少卿鍾謨使于唐賜以  
御衣玉帶欽天厯及犒軍帛十萬唐主嘗奏江南無  
鹵田願得海陵鹽監世宗曰海陵在江北難以交  
居至是詔歲給鹽三十萬斛俘獲士卒稍稍歸之

集

覽鹵田注見秦王政七年鹵之地海陵鹽監今泰

州古海陵也東晉分廣陵置海陵郡唐置吳州更

海陵曰吳陵縣南唐陞為泰州治質實一統志云海

海陵監去聲煮鹽之所曰鹽監陵漢之縣名

屬臨淮郡東漢省入東陽縣晉因之梁置海陵郡隋

初郡罷以縣屬江都郡唐武德中改為吳陵縣置吳

州尋廢州縣復故名屬揚州五代時楊吳置海陵制

置院南唐陞為泰州後其地入於周宋初改為軍元

置泰州路後為州屬揚州路至本朝

仍為州以海陵縣省入改屬揚州府

# 秋八月唐太子弘冀殺其叔父晉王景遂

景遂之赴洪州也唐主以李徵古為副使徵古傲狠

專恣景遂雖寬厚久而不堪常欲斬徵古而自囚左

右諫而止太子弘冀在東宮多不法唐主怒嘗以毬

杖擊之曰吾當復召景遂弘冀聞洪州都押牙袁從

範怨景遂密遣毒之景遂擊毬渴甚從範  
進漿飲之而卒未殯體已潰唐主不之知

發明

唐有國主而太子殺其叔父直書于冊不惟  
弘冀有惡逆之罪而唐主遂為具位亦且累

上矣

### 南漢主晟殂子鋹立

鋹年十六國事皆決於龔澄  
樞盧瓊仙等臺省備位而已

### 唐置進奏院於大梁○周遣閤門使曹彬如吳越

周遣曹彬以兵器賜吳越事畢亟返不受饋遺吳越  
人以輕舟追與之至於數四彬曰吾終不受是竊名  
也盡籍其數歸而獻之世宗曰卿之奉使者乞匄無  
厭使四方輕朝命卿能如是甚善然彼以遺卿卿自

取之彬始拜受悉以散於親識家無留者

### 冬十月周以高防為西南面制置使

世宗謀伐蜀以防為西南面水陸制置使高保融再遺蜀主書勸使稱臣於周蜀主集將相議之李昊曰從之則君父之辱違之則周師必至諸將能拒周乎皆曰陛下聖明江山險固秣馬厲兵正為今日臣等請以死衛社稷蜀主乃命昊草書極言拒絕之

### 周遣使均定境內田租

世宗留心農事常刻木為農夫蠶婦置之殿庭欲均天下租稅先以元稹均田圖賜諸道至是詔散騎常侍艾穎等三十四人分行諸州均定田租又詔諸州併鄉村率以百戶為團團置耆長三人又詔凡諸色

課戶及俸戶並勒歸州縣其幕職質實一統志云元州縣官自今並支俸錢及米麥質實一統志云元  
元和中舉制科第一拜左拾遺因陳西北邊事當路  
者惡之出為河南監察御史遇事敢言官至膳部員  
外郎嘗著均田圖  
獻帝帝嘉納之

十一月周命竇儼撰通禮正樂○唐放其太傅宋齊丘  
于九華山

初齊丘多樹朋黨躁進之士爭附之樞密使陳覺副  
使李徵古恃其勢尤驕慢及景達遁歸國人相懼唐  
主悲歎泣下徵古曰陛下當治兵以扞敵涕泣何為  
豈乳母不至邪會司天奏天文有變人主宜避位禳  
災唐主乃曰吾欲釋去萬機誰可以托國者徵古曰  
宋公造國手也陛下何不舉國授之覺曰陛下深居

禁中國事皆委宋公先行後聞臣等時入侍談釋老  
不亦可乎唐主心愠即命中書舍人陳喬草詔行之  
喬惶恐請見曰陛下下一署此詔臣不復得見矣因極  
言其不可唐主笑曰爾亦知其非邪乃止遂出徵古  
洪州罷覺近職鍾謨素以德明之死怨齊丘言於唐  
主曰齊丘乘國之危遽謀篡竊陳覺徵古為之羽翼  
理不可容覺自周還矯以世宗之命謂唐主曰聞江  
南連歲拒命皆宰相嚴續之謀當為我斬之唐主知  
覺素與續有隙固未之信謨請復之於周唐主乃因  
謨復命上書久拒王師皆臣愚迷非續之罪世宗聞  
之大驚曰審如此則續乃忠臣朕為天下主豈教人  
殺忠臣乎謨還以白唐主唐主欲誅齊丘等復遣謨  
入稟之世宗以異國之臣無所可否唐主乃詔暴齊  
丘等罪聽齊丘歸九華山覺宣州安置徵古賜自盡  
胡氏曰敵國謀臣我所惡也蓋有設間用計而去之  
者矣或有因其自相疑忌而幸之者矣未聞稱獎其



忠諭使勿殺如世宗者用

集覽

德明之死前年李德明使於周而還陳覺

等譖其賣國求

利唐主殺之

己周顯德六年六月恭帝宗未訓立。是歲凡五國三鎮

春正月周命王朴作律準

# 定大樂

初有司將立正仗宿設樂縣於殿庭世宗觀之見鐘磬有設而不擊者問樂工皆不能對乃命竇儼討論古今考正雅樂以王朴素曉音律詢之朴上疏曰禮以檢形樂以治心形順於外心和於內然而天下不治未之有也蓋樂生於人心而聲成於物物聲既成復能感人之心昔黃帝吹九寸之管得黃鍾正聲半之為清聲倍之為緩聲三分損益之以生十二律旋相為宮以生七調為一均凡十二均八十四調而大

備遭秦滅學歷代罕能用之唐祖孝孫考正大樂其  
法始備安史之亂什亡八九至於黃巢蕩盡無遺時  
有博士殷盈孫鑄鐘十二編鐘二百四十處士蕭  
承訓校定石磬今之在縣者是也雖有鐘磬之狀殊  
無相應之和其鑄鐘不問音律但循環而擊編鐘磬  
徒懸而已絃竹匏土僅有七聲名為黃鍾之宮其存  
者九曲考之三曲協律六曲參涉諸調蓋樂之廢缺  
無甚於今臣謹如古法以秬黍定尺長九寸徑三分  
為黃鍾之管與今黃鍾之聲相應因而推之得十二  
律以為衆管互吹用聲不便乃作律準十有三絃其  
長九尺皆應黃鍾之聲以次設柱為十一律及黃鍾  
清聲旋用七律以為一均為均之主者宮也徵商羽  
角變宮變徵次焉發其均主之聲歸乎本音之律迭  
應不亂乃成其調凡八十一調此法久絕出臣獨見  
乞集百官校其得失詔從**集覽**正仗宿宿謂宿衛也  
之百官皆以為然乃行之

正仗注見唐高宗永

徽五年仗下祭縣注詳見漢獻帝建安十八年軒縣之樂雅樂注見梁武帝天監元年鑄鐘注同上編鐘磬編鐘編磬注同上古法以秬黍定尺長九寸徑三分為黃鐘之管書舜典篇度量衡蔡氏傳曰以之審度而度長短則九十分黃鐘之長一黍為一分而十分為寸十寸為尺以之審量而量多少則黃鐘之管其容子穀秬黍中者一千二百以為龠而十龠為合十合為升以之平衡而權輕重則黃鐘之龠所容千二百黍其重十二銖兩龠則二十四銖為兩十六兩為斤此黃鐘所以為萬事根本也 正誤 有將立正仗宿設樂縣於殿庭今按正仗句絕宿字屬下句謂前一夕設樂縣也

書法

自元魏書陳仲孺奏律準已亥年至是幾四百年矣於是復見定樂之法先定律準故綱

目謹書之終綱

目書律準二

# 唐宋齊丘自殺

齊丘至九華山唐主命鎖其第穴牆給飲食齊丘歎曰吾昔獻謀幽讓皇帝族於泰州宜其及此乃縊而死諡曰醜繆初常夢錫深疾齊丘之黨與馮延巳魏岑之徒日有爭論因鬱鬱不得志縱酒成疾而卒至是唐主曰夢錫平生欲殺齊丘恨不使見之贈左僕射

## 二月周導汴水入蔡水質實

一統志云汴水在開封府界東流過蕭縣至徐州城

東北與泗水通蔡水即蔡溝水在汝寧府上蔡縣西南二里其水盈涸無源古有蔡河疑即此以通陳潁之漕

## 周減行苗使所奏羨田

開封府奏田稅舊一十萬二千餘頃今按行得羨田四萬二千餘頃敕減三萬八千頃諸州使還所奏減

之餘  
做此

# 周淮南饑

淮南饑世宗命以米貸之或曰民貧恐不能償世宗曰民吾子也安有子倒懸而父不為之解哉安在責其必償也胡氏曰世宗視民猶子救其乏而不責其必償仁人之心王者之政也五代十二君愛民者三人而世宗為最漕運給耗慮倍輸也保任令錄防貪穢也冬役春罷恐妨農也毀寺禁度僧減蠹弊也立兩稅限知早徵之害也設科求士欲吏治有方也均定田租使富不掩貧也併鄉村置團耆絕公阜侵漁也罷課戶俸戶省官方私擾也稱貸不責償欲下霑實惠也蓋自唐宣宗而後政不及民而置諸湯火之中者將百年而後世宗有君人之德行不忍人之政宜其赫然興起南面指麾而四海賓服也

集覽

公阜猶言公吏也阜注見唐高祖武德元年阜諫稱  
貸注見晉主重貴天福八年置諸湯火之中史記律  
書太史公曰文帝時會天下新去湯火索隱曰謂秦  
亂楚漢交兵時民之危險如陷墜湯火中即書仲虺  
曰民墜  
塗炭也

書法

志恤民也

### 三月周樞密使王朴卒

朴剛銳明敏志畧過人及卒世宗臨其  
喪以玉鉞卓地慟哭數四不能自止

夏四月周主自將伐契丹五月取瀛莫易置雄霸州遂  
趣幽州有疾乃還

欽定四庫全書

御批資治通鑑綱目

卷五十七

七

世宗以北鄙未復下詔親征命親軍都虞候韓通等將水陸軍先發四月通自滄州治水道入契丹境柵於乾寧軍南補壞防開游口三十六遂通瀛莫車駕至滄州即日帥步騎數萬直趣契丹之境非道所從民間皆不之知契丹寧州刺史王洪舉城降詔以韓通為陸路都部署我太祖為水路都部署自御龍舟沿流而北舳舻相連數十里至獨流口泝流而西至益津關契丹守將終廷輝以城降自是水路漸隘乃登陸而西宿於野次侍衛之士不及一旅從官皆恐懼胡騎連群出其左右不敢逼我太祖先至瓦橋關契丹守將姚內斌莫州刺史劉楚信皆舉城降五月朔侍衛都指揮使李重進等引兵繼至契丹瀛州刺史高彥暉舉城降於是關南悉平宴諸將於行宮議取幽州諸將曰陛下離京四十二日兵不血刃取燕南之地此不世之功也今虜騎皆聚幽州之北未宜深入世宗不悅是日趣先鋒都指揮使劉重進先發

據固安自至安陽水命作橋會日暮還宿瓦橋是夕  
不豫而止契丹主遣使命北漢發兵撓周邊聞周師  
還乃罷孫行友拔易州擒契丹刺史李在欽獻之斬  
於軍市以瓦橋關為雄州益津關為霸州命李重進  
將兵出土門擊北漢韓令坤戍霸州陳思讓戍雄州  
遂逐重進敗北漢兵於百井車駕至大梁往還適六  
十日

**集覽**

瀛莫瀛本漢河間國魏立瀛州宋陞河間府  
莫本漢鄭縣唐置州玄宗以鄭類鄭故去邑

改莫州今隸河間非道所從言從徑路直去不由大  
道也全本作河北州縣非車駕所過舳舻注見晉帝  
奕太和四年一旅注見梁武帝中大通二年固安縣  
名屬涿郡今陞為州在大都路易州本秦上谷郡地  
今置州在保定路土門注見梁主瑱貞

質實

一統志

明元年百井注見唐僖宗廣明元年

軍後唐所置屬幽州五代時陷入契丹置寧州周克  
復之置永安縣屬滄州宋置乾寧軍及乾寧縣大觀



初改軍曰清州金改乾寧縣曰會川元初改州為清寧府後改清州治會川縣至本朝初改為青縣屬河間府獨流口即獨流河之口也在河間府興濟縣北至靜海縣四十五里其地有蒲葦之利宋置獨流北獨流東二寨並津關五代唐所置今廢之故址在順天府南二百一十里瓦橋關五代唐所置今廢之故址在保定府城東北百二十里莫州唐初所置治鄭縣玄宗以鄭類鄭故去邑改為莫屬瀛州宋金元俱因之至本朝省入任丘縣仍屬河間府故城在縣北三十五里瀛州後魏所置治樂成縣後改河間郡隋罷郡置瀛州大業初改為河間郡唐改瀛州天寶初仍為河間郡乾元初復為瀛州五代晉初入遼周復取之宋陞為河間府瀛海軍節度元為河間路至本朝改為河間府直隸京師固安隋之縣名屬幽州唐屬北義州貞觀初復屬幽州金屬涿州元屬霸州後陞為固安州至本朝改為固安縣仍屬順天府易州

隋初所置治安易縣大業初罷州置昌黎郡尋改為  
上谷郡唐初復為易州天寶初改上谷郡乾元初復  
為易州遼置高陽軍宋號遂武軍金屬中都路元復  
為易州初屬大都路後改屬保定路至本朝因之以  
附郭易縣省入屬保定府雄州五代周所置以瓦橋  
關為之治歸義縣屬幽州宋初改為易陽郡金陞永  
定軍元復為雄州至本朝降為雄縣改屬河間府霸  
州五代周所置以益津關為之治永清縣屬幽州宋  
移治安縣金移治益津縣尋又析置信安軍元仍為  
霸州本朝因之改屬順天府

### 書法

遂者何決辭也乃者何不得已之辭也非有疾則華夏之氣伸矣

### 發明

周世宗可謂英武之君矣伐北漢伐南唐皆  
身履行陣俱有成功至是薄伐獫狁取闕南

如反掌使天意果厭犬戎則幽燕之地可以坐復  
惜乎未遂而遽止此固夷夏之大機也綱目於此

書周主自將取瀛莫等州既致其喜之意書遂  
趣幽州有疾乃還又致其惜之之意然則綱目之  
情蓋可

見矣

六月河決原武周發近縣民夫塞之集覽

原武縣名注見漢光武建

武九  
○唐泉州遣使入貢于周不受

唐清源節度使留從効遣使入貢請置進奏院於京師詔報之曰江南近服方務綏懷卿久奉金陵未可改置若置却上都與彼抗衡受而有之罪在於朕

發明  
周世宗可謂知大義者矣南唐未服則躬行討伐既服則務存大體故綱目前書餽之鹽還之俘至是又書泉州入貢不受泉州唐之藩方也世宗之弘規大度若此是豈區區淺度狹量者

所可同日語哉特  
書大書皆予之也

## 唐城金陵

唐遣鍾謨入貢于周世宗曰江南亦治兵修守備乎  
對曰旣臣事大國不敢復爾世宗曰不然曷時則為  
讐敵今日則為一家吾與汝國大義已定保無他虞  
然人生難期至于後世則事不可知歸語汝主可及  
吾時完城郭繕甲兵據守要害為子孫計謨歸以告  
唐主乃城金陵凡城之不完者葺之戍兵少者益之  
司馬公曰或問五代帝王唐莊宗周世宗皆稱英武  
二主孰賢應之曰夫天子所以統治萬國討其不服  
撫其微弱行其號令一其法度敦明信義以兼愛兆  
民者也莊宗旣滅梁馬殷遣子希範入貢莊宗曰比  
聞馬氏之業終為高郁所奪今有兒如此郁豈能得  
之哉郁馬氏之良佐也希範兄希聲聞莊宗言卒矯

其父命而殺之此乃市道商賈之所為豈帝王之體哉故勝梁之後曾不數年外內離叛置身無所誠知用兵之術不知為天下之道故也世宗以信令御群臣以正義責諸國王環以不降受賞劉仁贍以堅守蒙褒嚴續以盡忠獲存馮道以失節被棄張美以私恩見疎江南未服則親犯矢石期於必克既服則愛之如子推誠盡言為之遠慮其宏規大度豈得與莊宗同日語哉書曰無偏無黨王道蕩蕩又曰大邦畏其力小邦懷其德世宗近之矣

集覽

馬殷初梁太祖封殷為楚王

### 周主立其子宗訓為梁王

初宰相屢請王諸皇子世宗曰功臣之子皆未加恩而獨先朕子能自安乎至是不豫乃封宗訓為梁王

生七年矣

書法

封子不書主此其書何為周主也先是大臣

獨先朕子能自安乎至是不

豫乃封之周主可謂知節矣

周以魏仁浦同平章事我太祖為殿前都點檢

世宗欲相仁浦議者以仁浦不由科第為疑世宗曰  
自古用文武才畧為輔佐者豈盡由科第邪乃以王  
溥范質皆參知樞密院事仁浦同平章事樞密使如  
故仁浦為人謙謹世宗性嚴急近職有忤旨者仁浦  
多引罪歸己以救之所全活什七八故雖起刀筆吏  
致位宰相時人不以為忝又以吳延祚為樞密使韓  
通充侍衛親軍副都指揮使我太祖兼殿前都點檢  
世宗嘗問相於兵部尚書張昭昭薦李濤世宗愕然  
曰濤輕薄無大臣體卿薦之何也對曰陛下所責者  
細行也臣所舉者大節也昔張彥澤虐殺不辜濤累

疏以為不殺必為國患漢隱帝之世濤亦上疏請解  
先帝兵權夫國家安危未形而能見之此真宰相器  
之世宗曰卿言甚善然濤終不可置之中書濤喜詆  
諍不修邊幅與弟幹甚友愛而多謔浪無長幼體世  
宗以是薄之又以翰林學士王著幕府集覽不修邊  
幅僚屢欲相之亦以其嗜酒無檢而罷集覽不修邊  
幅儀禮也注見漢光武建武四年修飾邊幅謔浪詩  
終風篇謔浪笑傲注言戲謔不敬也謔許約反浪力  
葵反文公傳曰謔戲言也浪放蕩也嗜酒  
無檢嗜酒喜飲無厭足無檢不自檢束也

唐三榮殂梁王宗訓立

世宗大漸召范質等入受顧命謂曰王著藩邸故人  
朕若不起當相之質等出相謂曰著終日遊醉鄉豈  
堪為相慎毋泄此言是日世宗殂世宗在藩多務轄  
海及即位破高平之寇人始服其英武其御軍號令

嚴明人莫敢犯攻城對敵矢石落其左右畧不動容  
應機決策出人意表又勤於為治發姦擿伏聰察如  
神閒暇則召儒者讀前史商確大義性不好絳竹珍  
玩之物常言朕必不因喜賞人因怒刑人又言太祖  
養成王峻王殷之惡致君臣之分不終故群臣有過  
則面質責之服則赦之有功則厚賞之文武參用各  
盡其能人無不畏其明而懷其惠故能破敵廣地所  
向無前然用法太嚴群臣職事小有不舉往往寘之  
極刑雖素有才幹聲名無所開宥尋亦悔之末年  
寢寬登遐之日遠通哀慕焉梁王宗訓即皇帝位集  
覽大漸漢書注顏師古曰漸進也謂其疾大進篤惟  
危殆也顧命注見宋文帝元嘉十七年發姦擿伏  
注見漢宣帝本始三年面質責之質正也謂面斥責  
之也西漢汲黯傳黯質責張湯於上前顏師古曰質  
對之也登遐即升遐注  
見陳主伯宗光大二年



書法

世宗即位六年善政既多良法初立內修文

事外抗武功而其君人之度又有非後世所  
可及者豈不謂之賢主哉故書罷巡檢使臣書給  
漕運斗耗書制舉令錄法書禁度僧尼書立二稅  
起徵限書作刑統皆良法也書親錄囚徒書開壽  
州倉賑饑民書誅孫延希書均定田租書減所奏  
羨田書淮南饑皆善政也書撰通禮正樂書定大  
樂書設科目皆文治也書簡閱諸軍書伐蜀伐唐  
伐契丹皆武功也至於語言得失賞王環褒仁贍  
保嚴續卻泉州貢命金陵城可謂有君人之度矣  
夫豈五季諸  
君之所及哉

秋七月周以我太祖領歸德軍節度使○唐鑄大錢

唐自淮上用兵及割江北以事周歲時貢獻府藏空  
竭錢少物貴鍾謨請鑄大錢一當五十韓熙載請鑄

鑄錢唐主從謨計鑄當十大錢文曰永通泉貨又鑄當二錢文曰唐國通寶

### 八月蜀以李昊領武信節度使

蜀李昊領武信節度右補闕李起言故事宰相無領方鎮者蜀主曰昊家多冗費以厚祿優之耳起性婞婞李昊嘗語之曰以子之才苟能慎默堂為翰林學士起曰俟無舌乃不言耳集覽婞直婞說文狠也字通作悻孟子曰悻悻然見於其面楚辭曰鯨悻直以亡身

### 九月唐太子弘冀卒

弘冀卒有司引浙西之功謚曰武宣句容尉張洎曰太子之德主於孝敬今謚以武功非所以防微而慎德也乃更集覽句容尉句容縣名屬建康尉官名掌檢覆之事巡捕之責質實一統曰文獻

志云句容漢之縣名屬丹陽郡以縣有句曲山故名  
唐武德中於縣置茅州尋廢州以縣屬蔣州尋又屬  
潤州後屬昇州宋屬建康府元  
乃舊而本朝因之改屬應天府

唐主以其子從嘉為吳王居東宮殺禮部侍郎鍾謨

謨數奉使入周世宗及唐主皆厚待之恃此驕橫與  
二威都虞候張巒善數與屏人夜語唐鑄諧之曰謨  
與巒氣類不同而過相親狎恐其異謀又言大錢民  
多盜鑄犯法者多及弘冀卒唐主欲立鄭王從嘉謨  
與紀公從善善言於唐主曰從嘉德輕志懦又酷信  
釋氏非人主才從善果敢疑重宜為嗣唐主由是怒  
從嘉為吳王居東宮謨請令張巒以所部兵巡徼  
宣城唐主乃下詔暴謨罪流饒州貶巒宣州副使未  
幾皆殺之  
集覽 謨與紀公從善善為句從善名也封  
侯永通錢 於紀故曰紀公下善字係去聲契愛

之義也。謂鍾謨與從善相親善。

巡徽注見唐明宗天成元年。

書法

封子不書主。此其書主何獨斷也。而至殺鍾謨。又甚矣。終綱目封子書主五。詳見晉明帝

太寧

元年

# 南漢殺其尚書右丞鍾允章以龔澄樞為內太師

南漢主鋹以允章藩府舊僚擢為尚書右丞參政事甚委任之。允章請誅亂法者數人。以正綱紀。鋹不能從。宦官聞而惡之。內侍監許彥真告允章欲作亂。王清宮使龔澄樞內侍監李托等共證之。乃收允章斬之。自是宦官益橫。未幾以澄樞為內太師。軍國之事皆取決焉。凡群臣有才能及進士狀頭皆先下蠶室。然後得進。亦有自官以求進者。由是宦者近二萬人。貴顯用事之人。大抵皆宦者也。謂士人為門外人。不

得預事卒

集覽

銀丑兩反狀頭猶今言狀元下蠶室

以亡國

集覽

西漢司馬遷傳茸以蠶室顏師古曰

蠶室腐刑所居溫密之室也凡養蠶者欲其溫而早  
成故為密室蓄火以置之而新腐刑亦慮有中風之  
患須居密室乃得全因呼為蠶室又史記秦皇本紀  
隱宮注正義曰餘刑見於市朝惟宮刑一百日隱於  
陰室中養之乃可故曰隱宮所謂下蠶室是也自宮  
以求進書呂刑篇宮辟注宮淫刑也男子割勢婦人  
幽閉次死之刑也此云自宮以正誤自宮以求進今  
求進謂己自割勢以求為宦官正誤按南漢謂士人  
為門外人不得預事所用皆宦者故  
有自宮以求進用者非求為宦官也

書法

內太師何譏也趙高書中丞相澄樞書  
內太師皆譏也丞相非矣太師甚哉

唐以洪州為南都

唐以金陵去周境纔隔一水洪州險固居上游議  
徙邵之羣臣皆不欲徙惟樞密副使唐鑑勸之

### 周遣兵部侍郎竇儀如唐

儀至唐天雨雪唐主欲受詔於廡下儀曰使者奉詔  
而來不敢失舊禮苦雪霰服請俟他日唐主乃拜詔

### 契丹遣使如唐周人殺之

契丹主遣其舅使於唐州泰州團練使荆  
罕儒募刺客使殺之自是契丹與唐絕

質實

一統志云

泰州五代時南唐所置治海陵縣即楊吳時海陵制  
置泰州屬其地入於周宋初改為軍元初置泰州路  
後復為州屬揚州路至本朝仍為  
州以海陵縣省入改屬揚州府

御批資治通鑑綱目卷五十九